

澤州府志

人物

第八冊

澤州府志卷之三十六

人物志

節行 列女 孝義 寓賢 文學 技術 隱逸 方外
邑有賢人過者式廬焉讀古人書每想見其爲人象其衣
冠傳其嗜好而况得指其里居詳其軼事緒其話言并接
其苗裔而與之感歎而唏噓者乎澤之忠義可傳者不乏
而文學藝術多絕倫者爲之志人物第七其列女寓賢方
外悉萃於是

澤州府鳳臺縣

周藺相如趙人爲趙宦者令繆賢舍人趙惠文王時得楚和
氏璧秦昭王遣趙書願以十五城易璧趙王與諸大臣謀
欲予秦秦城恐不可得欲勿予卽患秦兵來計未定求人

澤州府志

卷之三十六

節行

一

可使報秦者未得繆賢曰臣舍人藺相如可使王問何以
知之對曰臣嘗有罪竊計欲亡走燕相如止臣曰夫趙疆
而燕弱而君幸於趙王故燕王欲結於君今君乃亡趙走
燕燕畏趙其勢必不敢留君而束君歸趙矣君不如肉袒
伏斧鑕請罪則幸得脫矣臣從其計大王亦幸赦臣臣竊
以爲其人勇士有智謀宜可使於是王召見相如問可與
璧否相如曰秦疆而趙弱不可不許王曰取吾璧不予我
城奈何相如曰秦以城求璧而趙不許曲在趙趙予璧而
秦不予趙城曲在秦均之一策寧許以負秦曲王曰誰可
使者相如曰王必無人臣願奉璧往使城入趙而璧留秦
城不入趙請完璧歸趙王遂遣相如奉璧西入秦秦王坐
章臺相如奉璧奏秦王秦王大喜傳以示美人及左右左

右皆呼萬歲相如視秦王無意償趙城乃前曰璧有瑕請指示王王授璧相如因持璧却立倚柱怒髮上冲冠謂秦王曰大王欲得璧使人發書至趙趙王悉召羣臣議皆曰秦負其疆以空言求璧償城恐不可得議不欲予臣以爲布衣之交尚不相欺况大國乎且以一璧之故逆疆秦之驩不可於是趙王齋戒五日使臣奉璧拜送書於庭何者嚴大國之威以修敬也今臣至大王見臣列觀禮節甚倨得璧傳之美人以戲弄臣臣觀大王無意償趙王城邑故臣復取璧大王必欲急臣臣頭今與璧俱碎於柱矣相如持璧睨柱欲擊秦王恐破璧乃辭謝固請召有司案圖指從此以往十五都予趙相如度秦王特佯爲予趙城實不可得乃謂秦王曰和氏璧天下所共傳寶也趙王恐不敢

不獻趙王送璧時齋戒五日今大王亦宜齋戒五日設九寶於庭臣乃敢上璧秦王度終不可疆奪遂許齋五日舍相如廣成傳舍相如度秦王決負約不償城乃使其從者衣褐懷璧從徑道亡歸璧於趙秦王齋五日後設九寶禮於庭引趙使相如至謂秦王曰秦自繆公以來二十餘君未嘗有堅明約束者也臣誠恐見欺於王而負趙故令人持璧歸間至趙矣且秦疆而趙弱大王遣一介之使至趙趙立奉璧來今以秦之疆而先割十五都予趙趙豈敢留璧而得罪於大王乎臣知欺大王罪當誅臣請就湯鑊秦王與羣臣相視而嘻因曰今殺相如終不能得璧也而絕秦趙之驩不如厚遇之使歸趙趙王豈以一璧之故欺秦耶卒廷見相如畢禮而歸之趙王以爲賢大夫使不辱於

諸侯拜爲上大夫秦亦不以城予趙趙亦終不予秦璧其後秦王使使者告趙王欲與王好會於西河外渾池趙王畏秦欲無行相如計曰王不行示趙弱且怯也趙王遂行相如從遂與秦王會渾池秦王飲酒酣曰寡人竊聞趙王好音請奏瑟趙王鼓瑟秦御史前書曰某年月日秦王與趙王會飲令趙王鼓瑟藺相如前曰趙王竊聞秦王善爲秦聲請奉盆缶以相娛樂秦王怒不許於是相如前進缶因跪請秦王不肯擊相如曰五步之內相如請得以頸血濺大王矣左右欲刃相如相如張目叱之左右皆靡於是秦王不憚爲一擊缶相如顧召趙御史書曰某年月日秦王爲趙王擊缶秦之羣臣曰請以趙十五城爲秦王壽相如亦曰請以秦之咸陽爲趙王壽秦王竟酒終不能加勝

於趙趙亦盛設兵以待秦秦不敢動旣罷歸國以相如功大拜爲上卿位在廉頗之右廉頗曰我爲趙將有攻城野戰之大功而藺相如徒以口舌之勞位居我上且相如素賤人吾羞不忍爲之下宣言曰我見相如必辱之相如聞之不與會每朝常稱病不欲與廉頗爭列已而相如出望見廉頗引車避匿舍人相與諫曰臣所以去親戚而事君者徒慕君之高義也今君與廉頗同列廉頗宣惡言而君畏匿之恐懼殊甚且庸人尙羞之况將相乎臣等請辭去相如固止之曰公視廉將軍孰與秦王曰不若也相如曰夫以秦王之威而相如廷叱之辱其羣臣相如雖驚獨畏廉將軍哉顧吾念之彊秦之所以不敢加兵於趙者徒以吾兩人在也今兩虎共鬪其勢不俱生吾所以爲此者以

先國家之急而後私讐也廉頗聞之肉袒負荆因賓客至門謝罪曰鄙賤之人不知將軍寬之至此也卒相與驩爲刎頸之交後九年相如將而攻齊至平邑而罷及長平之役相如病篤王欲使趙括爲將相如曰王以名使括若膠柱而鼓瑟耳括徒能讀其父書傳不知合變也王不聽軍遂大敗

晉虞溥爲鄱陽內史多惠政有白鳥來集入祀廟庭

唐趙景州人累官工部尚書天祐末兵亂棄官歸里惟述家世以明宗系廣建置以處族屬當五代割據禍卒不及人服其勇退有先見

宋段希堯晉城人祖約定州司戶父昶神仙令希堯自石晉鎮太原時辟爲從事與桑維翰同幕府晉有天下希堯累

澤州府志

卷之三十六

節行

四

歷清顯

段思恭希堯子以門蔭署鎮國將軍節度使官天福中父希堯任棣州刺史兼權鹽礬制置使思恭解官侍養開運初出爲華商等州觀察使契丹入汴軍士誼譟請立思恭爲州帥思恭諭以禍福拒而弗從漢隱帝時蝗詔徧祈山川思恭上言赦過宥罪議獄緩刑苟獄訟平則災害不生望令諸州速決重刑無致淹濫必召和氣從之周顯德中定濱州田賦世宗嘉之賜金紫建隆二年除開封令乾德初通判眉州時亡命攻州城刺史趙廷進懼將奔嘉州思恭止之因率屯兵與賊戰彭山軍人尙觀望思恭募勇士先登於是皆賈勇敗賊復矯詔以上供錢帛給賞後度支請按罪太祖廉其果幹不許艱起爲考功郎知泗州會馮繼

業自靈州來歸帝曰繼業以靈州非衛霍名將鎮撫不可汝其往哉思恭曰臣奉詔往必治帝壯之賜窄衣金帶錢二百萬下車卽矯繼業之失綏撫夷落訪求民病悉條奏免之俄而回鶻入貢路出靈州思恭遣吏市礪砂吏與之爭直思恭釋吏而械其使後其主齎牒來問故思恭理屈不報自是數年回鶻不復朝貢遷諫議大夫知揚州事多稽滯責授太常卿太宗時坐借官銀造器又妄以貢奉賤市民物降少府監雍熙元年南郊表乞復舊官端拱初遷給事中知陝州淳化三年卒年七十三思恭以門資歷顯官不知書然踐更吏事所至亦著勤績子惟一至太常博士三司度支判官從子惟幾第進士仕至兵部員外郎

宋太初字永初晉城人太平興國三年舉進士解褐大理評

澤州府志

卷之三十六

節行

五

事通判戎州以善政聞有詔褒美遷將作監丞判晉州雍熙三年判成都府賜緋魚詔求直言著守成箴以獻淳化中累遷刑部員外郎充陝西轉運使運芻糧命分三番抵靈州副使盧之翰併往爲戎人所剽上怒捕太初等責懷州團練俄復舊秩命權御史中丞先是按劾必豫請旨太初以爲失風憲體獄成上聞時論躓之出知杭州以素有宿疾浙右卑濕求近地得廬州疾久昏忘不能治大郡景德四年卒年六十二錄其弟繼讓試校書郎太初性周慎所至有幹職譽著簡譚三十八篇自序略曰廣平生纂文史者釋之學嘗謂禮之中庸伯陽之自然釋氏之無爲其歸一也喜以古聖道契當世之事而患未博也忽外物觸於耳目內機發于性情因筆而簡之以備闕忘耳子傳慶

後爲太子中舍人

劉羲叟字仲更晉城人歐陽修使河東薦其學術試大理評事權趙州軍事判官精筭術兼通大衍諸曆及修唐史令專修律曆天文五行志尋爲編修官改秘書省著作佐郎以母喪去詔令家居編修書成擢崇文院檢討未入謝疽發背卒羲叟強記多識尤長於星曆術數元祐五年日食心時胡瑗鑄鐘舛而直聲鬱不發又陝西鑄大錢羲叟曰此所謂害金再興與周景王同占上將感心腹之疾其後仁宗果不豫又月入太微曰後宮當有喪已而張貴妃薨至和元年日食正陽客星出於昴曰契丹宗眞其死乎事皆驗羲叟未病嘗曰吾及秋必死自擇地於父冢傍占庚穴以語其妻如其言葬之著十三代史志劉氏輯曆春秋

澤州府志

卷之三十六

節行

六

災異諸書 按羲叟之學受之李之才時之才爲澤州僉判史謂其器大難於識者易傳伏羲先天四圖其說皆出邵雍氏雍受學於之才之才得之穆修修得之种放放得之陳希夷搏之才之學淵源有自一授邵雍一授羲叟康節之書流布淑後而仲更之書迄無存焉今見者祇新唐書中律曆天文五行志而已史云世稱羲叟曆法遠出古今上有楊雄張衡所未喻者實之才授之

王獻可州人知瀘州黃庭堅謫於涪獻可遇之甚厚時人稱之仕至英州刺史

王霽獻可長子崇寧間諫官抗疏劾蔡京罪論配海上欽宗復其官從种師中拒完顏括於榆次以姚古援兵失期戰死

王雲字子飛澤州人獻可次子舉進士從使高麗撰雞林志以進擢秘書省郎出知簡州遷陝西轉運使宣和中從童貫宣撫幕入爲兵部員外郎靖康元年以給事中使幹離不軍議割三鎮以和使還道幹離不之意以爲黏罕得朝廷所與余覩蠟書堅云中國不可信欲敗和約執政以爲不然罷爲徽猷閣待制知唐州金人陷太原召拜刑部尙書再出使許以三鎮賦入之數雲至眞定遣從吏還言金人不復求地但索五輅及上尊號且須康王來和好乃成欽宗悉從之且命康王及馮澥往未行而車輅至長垣已爲所卻雲亦還澥奏雲誕妄誤國雲言事勢中變金人必欲得三鎮不然則進兵取汴都中外震駭詔集百官議雲固言康王舊與幹離不結歡宜將命帝慮爲所留雲曰和議旣成必無留王之理臣敢以百口保之王遂受命而雲以資政殿學士爲之副頃雲奉使過磁相勸兩郡撤近城民舍運粟入保爲清野之計民怨之及是次磁州又與守臣宗澤有憾於是康王出謁嘉應祠雲在後民遮道諫曰肅王已爲金人所留王不宜北去厲聲指雲曰清野之人眞姦賊也王出廟行或發雲笥得烏絕短巾蓋雲夙有風眩疾寢則以護首者民益信其爲姦譟而殺之王見事勢洶洶乃南還相州建炎初贈觀文殿學士與兄霽稱一門隻忠 按留守宗澤志在恢復中原迎還二帝爲報讐雪耻計其忠義可貫日月澤病亟時猶呼渡河者三與雲有憾憾其圖和也然和議誤國之罪在檜不在雲民洶而死之雲亦不幸罹此也

王忠植太行義士也紹興九年取石州等十一郡授武功大夫華州觀察統制河東忠義軍馬遂知代州尋落階爲建寧軍承宣使龍神衛四廂都指揮使河東經略安撫使明年金人圍慶陽急帥臣宋萬年乘城拒守會川陝宣撫使胡世將檄忠植以所部赴陝西會合行次延安叛將趙惟清執忠植使拜詔忠植曰本朝詔則拜金人詔則不拜惟清械忠植詣其右副元帥撒离曷不能屈使甲士引詣慶陽城下諭使降忠植大呼曰我河東步佛山忠義人也爲金人所執使來招降願將士勿負朝廷堅守城壁忠植卽死城下撒离曷怒詰之忠植披襟大呼曰當速殺我遂遇害世將上其事贈奉國軍節度使開封儀同三司官其家十人

澤州府志

卷之三十六

節行

八

梁興太行忠義砦人宋紹興間秦檜主和議未幾金人渝盟入侵上賜手札與岳飛從便措置飛部署諸路定又遣梁興歸糾合兩河忠義社取河東北旣而十七路皆捷而梁興會太行忠義及兩河豪傑趙雲李進董榮等
大破金人于垣曲又捷于沁水追至孟州之邵原金張太保成太保等以所部降又破金太尉兵于濟源梁興復取懷衛二州大破兀朮軍斷山東河北金帛馬綱之路金人大敗未幾召還岳飛下獄死賊檜又令田師中毒殺飛將牛臯世以爲恨云

金郭俟字伯有澤州人大定二十二年進士調長子主簿萊州觀察判官萊陽縣令補尚書省令史除大理司直母憂起太常博士御史臺荐才幹可用詔升一等遷平陽府治

中尋召知登聞鼓院兼秘書丞滕州刺史同知真定府事
上言每季令注巡尉官吏刑兩部斟酌盜賊多寡處選注
議行之遷國子祭酒泰和六年侵宋充宣差山東安撫副
使大安元年轉泰定軍節度貞祐三年行六尚書改河北
西路轉運使致仕元光二年卒

元李俊民字用章號鶴鳴老人唐韓王元嘉之後家於澤州
得河南程氏之學金承安中舉進士第一應奉翰林文字
貞祐中任沁水令兼提舉長平倉事進階朝請大夫未幾
棄官不仕以所學教授鄉里從之者甚盛至有不遠千里
而來者金源南遷隱於嵩山後徙懷州俄復隱於西山既
而變起倉猝人服其先知俊民在河南時隱士荆先生者
授以邵雍皇極數時之知數者無出劉秉忠之右秉忠亦
自以爲弗及也元世祖在潛藩秉忠盛稱之以安車召延
訪無虛日遽乞還山世祖重違其意遣中官送之又嘗遣
張仲一問以禎祥及卽位其言皆驗俊民卒賜諡莊靖先
生著有莊靖文集澤守段正卿刻其遺集十卷

張翥字仲舉晉寧人其父爲吏從征江南調饒州安仁縣典
史又爲杭州鈔庫副使翥少時負其才雋豪放不羈好蹴
踘喜音樂不以家業屑意其父以爲憂翥一旦翻然改曰
大人勿憂今請易業矣乃謝客閉門讀書晝夜不暫輟因
受業於李存先生存家江東大儒也其學傳於陸九淵氏
翥從之講道德性命之旨留杭又從仇遠先生學遠詩最
高翥學之盡得其音律之奧於是翥遂以詩名一時至正
初傳巖薦翥隱逸召爲國子助教尋退居淮東會修遼金

宋三史起爲翰林國史院編修史成遷太常博士又遷翰林直學士兼祭酒翥勤於誘掖絕去崖岸以經義問者舉衆說折衷襍以談笑無不厭其所得遷翰林學士承旨李羅帖木兒入京師命翥草詔削奪擴廓帖木兒官爵毅然不從或勸之曰吾臂可斷筆不能操也上知其不可奪命他學士爲之及李羅誅乃以爲河南行省平章政事致仕給全奉終其身年八十二卒翥長於詩其近體長短句尤工文不如詩而每文自負曰吾於文已化矣吾未嘗構思特任意屬筆而已它日翰林沙刺班示以所爲文請易數字苦思移時終不就沙曰先生於文豈猶未化耶翥因相視大笑翥平日善諧謔出語每傾一座所爲詩文甚多無丈夫子及死國遂亡以故遺藁不傳有律詩樂府僅三卷

澤州府志

卷之三十六

節行

十

翥嘗集兵興以來死節死事之人書曰忠義錄

段直字正卿澤州晉城人至元十二年河北河東山東兵亂雲擾倡義團聚保境是時守兵橫暴頗爲民害直請撤去願自行聚保州內署潞州元帥府右監軍其後論功行賞分土世守卽命爲本州長官直招集流俘收養孤疾民賴以寧復創建學宮購書置田以給生徒迎李俊民於河南以爲之師不五六年士之通經與選者百二十二人事聞特命提舉學校卒子紹隆嗣

工傑以父思忠雲州知州廕補官初授潞城簿歷聞喜尹當延祐中均賦興學以廉幹稱轉冀寧路治中進階奉議大夫

明王仲達州人洪武二年以孝廉舉知中江事秩滿乞還養

親永樂初復取入仕堅志乞養如初賜勅獎諭給鈔以歸
茹大素州人洪武四年庚戌鄉舉上書稱旨授御史五年設
提刑按察司擢四川按察使執法平允七年召爲刑部侍郎
郎降主事陳時政五事累萬言命中書王敏讀疏中言才
能之士數年來幸存者無多今所任皆迂儒俗吏上怒召
予杖將議罪宋濂救之次夕復誦其疏可行者四事才五
十言因令定奏對式使言者直陳得失無事繁文十年遷
浙江右叅政尋賜侍親十六年召爲刑部郎中歷僉都俄
降翰林檢討十八年擢戶部尚書大素抗直不屈每忤旨
宥之國初經制肇造寬雲南陝西屯田歲輸之粟以兩浙
富民避徭役詭寄田產立魚鱗圖冊悉書主名又詳定府
庫出入勘合以防奸僞皆大素奏而行之者上嘗宴便殿

澤州府志

卷之三十六

節行

十一

賜酒曰金盃同汝飲白刃不相饒大素續曰丹誠圖報國
不避聖心焦上爲之惻然未幾謫御史復坐詹徽事與同
官繫足治事二十二年以事謫外尋召入自經編置子孫
於雲南至嘉靖時多有達者七世孫茹夔茹言中雲南嘉
靖壬午鄉科言子茹子嘉中癸卯鄉科官工部郎中

張昺澤州人洪武中舉人才授禮部主事二十六年命試禮
部右侍郎二十八年陞禮部左侍郎建文元年諸藩國相
繼告變廷臣建議凡藩國所在悉更置守臣必素負重望
者居之乃以昺爲北平左布政使有事練兵許以先發後
聞已而尚書齊泰薦謝貴有智勇以爲北平都指揮使副
昺伺察文皇動靜怵誘其官屬知文皇必起兵陰爲之備
椽吏李友直謫人也昺以心腹寄之友直以昺奏通燕燕

以是欲除昺憚都指揮彭二有威名稱疾不出燕府長史葛誠告昺曰王實不病昺不信誠因密疏以聞文皇恨殺誠族其家張玉朱能勸王起兵文皇曰昺貴已先發非計擒二人不可當是昺貴部署北平七衛兵逼王城盡柵端禮四門會朝廷遣使逮燕官校文皇盡縛官校置庭中給昺貴人與械去昺貴入至端禮門內伏發爲燕山右護衛副千戶譚淵所執文皇擲杖起立曰我何病爲爾輩所迫耳二人不屈死之昺屍得還葬己卯七月六日也彭二未入聞昺貴既殺急跨馬大呼市中集兵得千餘人欲入端禮門文皇遣力士龐來興丁勝格殺彭二衆遂潰四臣死文皇乃起兵友直遂得爲北平叅議靖難後族昺家焚殺近戚程亨輩踈遠及里人戍邊一子得避脫文皇屢夢昺

披髮爲厲出焚其屍面如生正德十五年知州馬汝驥立祠祀昺汝驥有行誼官至禮部侍郎謚文簡按昺於燕稱貴彊矣長於料事短於任人卒爲李友直所賣事起駭不全之地計當內外相形一出一入謝貴甘與同戮兩腐鼠耳嚮使貴勒兵觀變協彭二守端禮門敵必不敢睥睨昺昺卽死而貴與彭二問死狀責專殺以堪讐人之胸成敗卽未可知遂其由來以身許國之義兩指揮左提右挈豈少一昺哉昺與謝彭俱死而王者不死宜其智勇之不終也不然葛誠以國情輸昺昺於此時先發可手了者謝貴彭二葛誠誼皆爲昺用也革除遺事李友直卽拜右叅議後累遷至尙書與黃福爲時大臣然則友直不爲昺用也久矣

明鄧泳傳

按明紀燕王病昺間疾殿中王盛夏擁爐

四圍火逼猶寒顫葛誠報昺王僞病也昺且信且疑顧兵備已嚴睨王府在甯中不加意張玉朱能請起兵王曰非計擒昺貴不可既殺昺株連親戚程亨等五人王曰張昺之親與鐵同頑直須爐冶引出生燒之踈遠里人並戍邊洪熙元年詔戚屬戍邊者籍一人餘悉縱還

程亨州人官檢討與張昺有連建文遜國時從亡者史彬程濟而下二十人亨其一也彬遣舟迎帝過吳江同載八人亨與焉會昺族抄及亨家時亨已遁逮其妻楊子禮禮妻張俱生燒之尋亨就郭質連州而史彬何洲亦至見亨大慟遂偕訪帝重慶不值走雲南遇程濟於白龍山深處帝結茅山麓病困乏食引拜床下見帝形容枯瘁相向痛哭各進方物留侍許久已辭歸避地分散徃來陰左右之後

澤州府志

卷之三十六

節行

十二

不知所終 州志曰當時僉謂帝自焚死議者止憑成祖實錄故于從亡者一槩抹撥其人其事彫零磨滅遂不可復考志之失傳又何怪焉謹按世法錄紀事本末諸書摭拾大略如此 按建文從亡時事明紀史彬著致身錄其中叙建文出亡始末及從亡諸臣徃來踪跡特詳錢宗伯謙益書致身錄後一篇辨之不遺餘力併程濟諸人謂皆並無其人無其事夫宗伯之辨力矣然紀載之冊不第致身一錄豈盡虛妄至子鵝炙及宮中老佛之語延及繼世何敢誣援宮禁傳聞而造作之巧合如是耶縱史彬當時人或繁其說數傳而後何流傳指稱之鑿鑿者不一而足也乃今實有其人自宜傳信痴兒之惜藉以行權三丰之訪未忘隱慝亦可以徵徃說矣

楊砥字大用州人洪武末進士授行人司右司副讜直幹練
上言孔廟從祀宜退楊雄進董仲舒乃合萬世公論詔從
之歷官湖廣布政司叅議建文初言帝堯之德始于親九
族今宜惇睦諸藩無自撥本根論與齊黃左落職戍遼陽
靖難後起鴻臚卿擢禮部侍郎言民間子弟入學者宜復
其身著爲令坐視河渠失旨降工部主事改禮部閱馬北
還遷太僕兼苑馬寺是時自吳橋至天津大水決隄疏請
開德州東南黃河故道及土河以殺水勢用其言命侍郎
藺芳經理之又請定北京編戶養馬法不收牧場子粒民
五丁養種馬一匹每十匹立羣頭一人五十匹立羣長一
人養馬家歲蠲租糧之半而薊州以東至山海諸衛水草
豐羨其屯軍人養馬一匹租亦免半命軍租盡蠲之餘悉

澤州府志

卷之三十六

節行

十四

從其議馬大蕃息而民亦利焉洪永馬政之善蓋權輿砥
也砥剛介有守而尤篤孝父歿廬墓母喪賜鈔千錠扶櫬
步行歸葬竟以足疾哀毀卒遣使諭祭

侯璉字廷玉州人慷慨有大志永樂癸卯鄉試第一人宣德
丁未成進士爲行人以善辭令而剛果能斷得名四川雲
南廣西諸土官有爭地累年不決者朝廷以命璉至則按
圖考志召諸耆老開誠布公智力貨賄不可移由是皆服
而罷上以爲能交趾黎麟請命璉副禮部侍郎章敞徃錫
封至其境關門低且隘先驅者當偃伏璉止之曰此中國
所謂狗竇也於土人出入則宜今天命下臨不可由此度
迓者驚懼爲撒關乃度由是蠻中益謹禮不敢肆旣歸毫
髮無所受人以此益賢之遷兵部主事虜寇阿台朶兒只

伯犯邊與會川伯趙安尚書柴車等自梁州分兵出鐵門關攻敗之與有勞績以外艱歸服除陞郎中麓川思任發反詔尚書王驥率帥討之璉在行間往來督戰視將校用命不用命定賞罰賊攻大侯州以偏師往援令於衆曰吾視賊氣驕有輕我心宜掩其不備卽率衆破之鬼哭山呼聲動天地斬殺無筭賊大潰我師益奮與叅將冉保等破石甸等十餘寨聞大將軍至麓川賊阻截不得通復與保等由高黎貢山晝夜兼程進與大將軍合搗其巢穴賊遂平凱旋遷禮部右侍郎賜白金五十兩鈔五十錠幣五表裏且賜誥命以寵之尋奉勅出鎮雲南得便宜從事雲南饑乃發倉廩募富民出粟以賑之全活甚衆會再討麓川餘黨璉引偏師由平崖南甸進破賊子思機發所居寨獲

其妻孥輜畜捷聞陞左侍郎賜白金綵幣遷兵部左侍郎復鎮雲南築騰衝城置軍衛焉時議以賊子思機發在孟養復命靖遠伯王驥以兵往勦之璉與都督張軌分軍抵金沙江造船先濟奪賊地爲營於是大軍畢渡燬其柵而進賊奔孟養度不可支各鳥獸散去窮追至孟糯海子等處不可得班師諸酋長皆驚駭曰古漢人無渡金沙江者今大將軍至此眞天威也南人無復反矣還鎮雲南景皇帝卽位遣使齎勅嘉勞值貴州飢苗叛攻圍新添諸衛道梗弗通城中食盡命總督軍務往征之時普定圍急乃自雲南選善射者爲前鋒自將至普定督戰矢下如雨賊大敗圍解遂趨貴州副總兵都督田禮等以兵來會克龍里甕城羊腸楊老金溪諸路新添平越清平都勻諸圍俱解

由興隆而下抵鎮遠皆平定事聞上嘉其功晉兵部尙書
又進克安莊克西堡長官司時暑雨方盛瘴癘大作礎得
疾昇普定醫弗效諸將問疾惟戒以勿輕此賊合整兵進
勦無遺患生民未嘗一語及私時年五十有三庚午八月
十三日卒上聞嗟悼遣官賜祭命歸其柩於澤州有司治

墳以葬

明田汝成列卿紀

段正字以中號介菴州人成化乙酉舉於鄉成進士授元城
令聽斷無留滯有水患多方疏塞民賴以安晉御史巡按
河南貪墨望風避再按江西歲饑閩盜起賑理防禦約束
凡四十條得無事特命再巡一年遷浙江按察會大木規
畫救治民免漂溺尋謫柳州同知值艱改汝寧擢荊州府
舉河南叅政遷江西左叅政興利除弊王都憲恕稱爲一

澤州府志

卷之三十六

節行

十六

路福星卒年五十八貧不能治葬所著有介菴集柏臺公
案諸程日記宦遊記

宋甫舉人性篤孝貌古心純行事畫地而蹈讀書苦思力索
解後灑如也從張澤游志河津之學父歿廬墓事聞旌其
門弘治間知忠州以清節著

丁伯通經魁任慶陽府推官刻苦嗜學著綱目續編州志十
卷

裴椿歲貢官清豐縣丞弭盜築隄薄賦興教祠名宦少失怙
事母至孝母歿廬墓三年以母嗜茄種於墓側茄生連理
更有烏鵲鶴翔之異孝宗表其宅家居講廟制修宗器鄉
里式之

孟春字時元弘治丙辰進士授刑曹清慎有聲守嚴州以清

官第一稱擢同寺力拒閹瑾及守璫勒賄巡撫宣鎮威惠並著時于經錢寧江彬等閹勢甚張來索糧價數萬緡堅持不與大璫張永行邊過宣大羣僚匍伏春長揖而已羣小銜之卒爲所中落職嘉靖初薦起巡撫順天時大旱奏辯許銘寃并乞斬貪弁暨宸濠逆黨以答天譴設豫備倉經畫部內得糧二十萬石詔嘉予晉吏部侍郎上言大同反側惟無控制大臣故及此乞添宣大及陝西三邊總制各一員報可佐銓望重世廟賜行不自欺四字旌之未幾十大獄起復以直言忤時宰遂與顏頤壽馬錄同時削籍疾革囑殮以青袍角帶贈工部尚書子陽死諫別傳

段豸字世高州人隸籍錦衣衛舉進士博學善議正德時自河南節推歷臺諫以劉瑾累左遷棗強令縣當賊衝流寇

澤州府志

卷之三十六

節行

十七

克斥畿輔官軍不能制豸修城設備甫定而劇賊劉六劉七等合兵二千渡河來屯聚城下豸親督戰奮勇貫陳一日敵三却獲俘二百殲賊首一人賊怒攻益急他將宋振擁兵不救越三日城陷豸被四矢一鎗洞脅瞑目大呼殺賊而死遂屠城詔贈太僕卿賜祭予蔭立祠如制

郜相字立之州人正德丁卯鄉舉嘉靖間朝邑令廉謹自持政平訟理役均盜息特建忠臣高翔及劉烈女祠號知大體歷貴州布政使祀長蘆名宦

孟陽字子乾吏部侍郎春之子正德九年進士爲行人勞軍宣鎮抗宦者以禮使韓府却餽惟受贈行詩四載不調或諷之見要入陽曰此謁一入終身可湔洗乎會武宗自稱鎮國公將南巡舉朝洶洶舒芬等極諫陽與同官曰此舉

繫社稷安危一命之士皆應憂國豈必言官乃當効死遂率同官余廷瓚李紹賢詹軾劉槩李惠等十九人直斥權奸誤國上震怒悉下錦衣衛獄杖四十旣罰跪午門梏拳五日逆闖江彬乘間又激怒上復加杖以彬監之杖甚毒陽仰天曰今日得死所矣時創重斃者陸震而下十一人其一陽也世宗嗣位贈御史廕一子高陵呂文簡柎銘墓有云愛身何薄愛國何厚于生無羞于死無負春閨子死諫哭之以詩語極悲壯人爭傳之

裴騫正德辛巳進士有敏才學尤該博嘉靖中官通政司右叅議終山東副使所著有滁陽薊門等集

丁謹州人嘉靖丙戌進士觀政時命勞軍固原奉使清介軍士悅服知宜興縣平刑興學多善政先是太祖初下常州

澤州府志

卷之三十六

節行

十八

師行餉匱暫借征宜興武進額外糧一年又外徵每畝耗五升一時定亂救急勸諭輸助之征原非經制乃相沿至正嘉時尚未除重困民力逋負累積猷骨催科歷年不清謹蒞任力請上官疏豁得蠲三之一罷加耗畝四升二合計歲減米八萬石有奇積困稍甦縣田濱震澤多淤廢不治謹相度修濬出可耕之地二千七百餘頃遺愛在民畫像祠祀

鍾鑑州人嘉靖己丑進士知巢縣名廉能時大水爲患鑑請酌劑賦稅以蘇民其編審均徭法甚善臺使者榜爲諸縣式調獻縣外艱徒跣奔喪廬于墓側服闋補洛陽歷知河南府陝西副使有風力杖咸寧侯仇鸞豪僕仇榮等闢荒田三萬頃楊襄毅上其事遷叅政關隴大饑鑑發粟以賑

全活以億萬計方艾引疾歸讀書教子閉戶絕跡閭黨罕
識其面士論高之著有禮經主意

孟霽州人嘉靖己丑進士任陝西督糧道明敏廉介剛柔交
濟督儲有方每師出糧餉充裕兵民無擾而臺體肅然放
衙垂幙優游文翰蕭然事外著詩紀集

裴宇字子大嘉靖辛丑進士官翰林至禮部尚書先是陪京
振武營軍譁殘殺重臣驕縱不可治宇攝本兵呼首謀者
諭以禍福立折其邪心分其衆使隸神策三大營俾不得
合勢旬日而定轉工部尚書清洲田乾沒之弊豪右帖服
廻翔南寺部二十餘年恬退自安當肅宗崇尚道術大臣
徃徃以青詞希旨宇視之泊如也所著有內山集張毅敏
養蒙師事之

澤州府志

卷之三十六

節行

十九

陳天祐瑀子瑀有文而試小吏不屈上官天祐嘉靖甲午成
進士官戶曹終陝西副使剛方有守工著作臺使以下咸
屬草宋詩元曲尤善擊萃焉

趙九思字心海善說詩隆慶辛未進士知咸寧縣廉而惠治
最應得臺垣以不揖江陵私室補南戶曹尋改北計部民
攀號車枳不得行屢奉差矚然不滓遷鄜延兵備值檄
部內墾荒田蠲給牛種凋瘵漸起裁班軍五百省州縣供
應民稍蘇敵闌入永興堡殺掠甚多總督詭首功冒廢御
史沈時叙廉得其罔知九思不阿密問狀具以實對遂疏
其事適沈暴亡總督使探御史篋見九思札心銜之中以
他事訖不能免廷論時盡直九思逾年以原官調四川行
次新鄭卒聞者惜之性和讓而不比周居官喜造士布袍

疏水暇手一編居然寒峻也著四時讀書樂以見志

苗煥字爾章嘉靖甲子進士有志節善治劇知寶豐縣調魯山計擒礦賊李謳奸豪程徵明等訶陰事爲恐喝名窩訪立懲以法奪還屯卒侵民田二縣祠煥如一遷丞鎮江中以事降平山縣繼爲戶曹權河西務一無羸羨歷知保寧府化嚴爲寬監司欲築墻防盜煥云是害民倍於盜也力爭不可遂棄官歸林官三十載有劉季陵之風子胥士巡撫別有傳

王忠顯鄉舉第一知清水縣潔已愛民廷質者旣決兩造曲直旋以息爭意委曲勸諭以平其心訟獄少衰遷知平涼府力白韓王幼孫非僞卒得立兼白揮使坐賊之誣終肅州道加按察使子采孫緒宏俱殉難名臣

澤州府志

卷之三十六

節行

二十

張養蒙字泰亨州人萬曆五年進士選庶常歷吏科左給事中少負才名明習天下事居言職慷慨建白時南北多水旱條三事曰治奸民恤流民愛富民論覆軍言罪由撫臣徐元泰言度支恐爲瓊林大盈之續其他寬採木罷織造并彈何起鳴巧軋辛自修狀語多切直錦衣衛指揮羅秀夤緣得僉書秀本閩人滕祥奴子賄入禁衛往歲營僉書兵部尚書王遴持正爲所中傷去未幾秀卽躡用物議沸騰養蒙疏發其狀乃黜秀御史高維崧等言事被謫養蒙偕同官論救尋遷工科採木四川商人有輸木後者詔追銀以養蒙言獲免論河工疏言河臣報成未久急求謝事而繼者復告患矣其故皆由不久任也夫官不久任其弊有三後先異時也人已異見也功罪難執也請做邊臣

例增秩久任上深然之潞安進絀二千四百疋復命增五千率同官力爭不從出爲河南參政召太僕卿四遷左副都御史萬曆二十四年極諫時政闕失有三輕二重之弊一曰部院體漸輕如冬官一曹亞卿專署已爲異事乃冢宰何官數月虛位法司議劉世廷罪竟爾留中主事劉冠南疏入卽發何小臣聽而大臣不聽單疏下而公疏不下哉至戶曹三疏諫開礦臣院九疏催行取皆置不報夫議大事十疏九不行遇廷推十人九不用國事將何賴乎一曰科道之職漸輕工科都給事久虛不補御史曹學程一繫不釋考選臺諫屢請屢格甚至服闋補任亦皆廢閣是不欲言路之充也國是將何定乎一曰撫按之任漸輕如開礦一事撫按有言咸蒙切責因而鄭一麟以千戶而妄

劾孫鑛王虎以中官而妄劾李盛春夫闖人武弁反得以制巡撫之命紀綱不倒置乎一曰進獻之途漸重今下僚捐俸儒士獻貲名曰助工實懷覬幸甚者百戶王首仁以謀復世爵妄構楚府主簿張以述以求復舊職妄獻白鹿而部臣糾之不聽言官糾之不聽不至如嘉靖末年之濁亂不止也一曰內差之勢漸重中使紛然四出乞請之章無日不上批荅之旨無言不溫左右藉武弁以營差武弁藉左右以網利採礦不已必及採珠皇店不已漸及皇莊繼而營市舶繼而復鎮守內可以謀坐營外可以謀監軍正德敝風其鑿不遠惟早見而速圖之社稷蒼生之福也不報又明年六月兩宮三殿災上疏曰近日之災前古未有請躬謁郊廟以謝嚴譴立御便殿以通物情早建國本

以繫人心停銀礦皇店之役杜四海亂階減宦官宮妾之
刑弭蕭牆隱禍然此皆應天實事猶非實心也臣仰瞻穆
清成心有四一曰好逸一曰好疑一曰好勝一曰好貨願
戒此四者亟圖更張庶天意可回國祚可保不省旋論本
兵石星惑奸人沈惟敬主封倭非是前後章數十上新建
惡其直謂此曉曉北黨渠魁也思去之先是以駁止說閣
忤江陵後屢遭齟齬外之於叅藩于操江于督餉欲困以
不能乃所至有聲防倭治兵鑿鑿副名實而坐籌水陸交
運法集餉二十餘萬佐東征當議三王並封時不以師事
太倉故少阿狗率同館余繼登馮琦力爭之事遂寢妖書
獄起牽連呂坤魏允貞白所知等首竄養蒙禍且不測賴
神宗鑒別置不問新建罷四明入借司農論理財不合兩

逐之而養蒙去國矣遷戶部侍郎時督朝鮮餉事予一子
官署部事三十年一時忠讜無兩而能持大體歿天啟初
贈戶部尚書謚毅敏鄒忠介元標姚文毅希孟序其奏疏
鑄而行之子光房進士歷官光祿少卿忤時政歸次光斗
剛直有父風次光奎殉寇難別傳

周盤字心銘萬曆甲戌進士知河間長垣二縣嚴而理擢御
史疏糾都諫以禱疾媚江陵者云臣聞子爲父禱未聞諫
官爲宰相禱也出按河西廷議主戰獨持重巡河北防倭
治河護陵有功視京營清戎政晉僉都撫甘肅與同事講
求兵要大小二十餘戰上首功數千級以勲積階至本兵
予世職廕官推予兄孫慎半生戮力封疆不徼功不飾敗
卒稱蓋臣恭其兄監特至吉水鄒元標嚴譴歸不懼江陵

威遇之益厚居鄉設義倉著古文襍集奏疏數卷

徐觀瀾字涵碧萬曆甲戌進士方居諫垣關白陷朝鮮出師援勦詭請封貢命集議觀瀾與廷臣交章止之而尚書石星力持不聽及封事壞喪師辱國楊鎬掩敗奏捷贊畫丁應太以聞下鎬於理因遣觀瀾往勘東征事隨報四路潰兵狀請論武臣失事如法不避險難歷釜山尉山等處廉其虛實直糾沈一貫蕭大亨邢玠萬世德黨和賣國疏未達大亨危之一貫簡觀瀾前疏有抱病語票准回籍改命代勘適關白暴亡邢萬輩遂貪天冒功而觀瀾坐廢應太亦落職直臣不容於時如此

翟學程郡之嶺東里人父從儒性方嚴長至日見里門死者橫道因簿正行乞人煮粥食之盡冬方止歲以爲常學程

澤州府志

卷之三十六

節行

二十三

少攻苦父嘗昧爽出猶見帷燈驚促之寢萬曆辛卯舉於鄉癸丑授儀真令繼除安岳令咸理岳居六路之衝爲川北門戶辛酉劇盜作難備戰守策有陝商人李邦定以勇氣聞因禮聘禦敵賊嘯聚劫掠邦定手刃十餘鎗折仗劍死學程擒賊磔而祭之時叅戎秦明屏過蓬溪哭而請援兩日三捷全蜀藉以寧癸亥考選鄒忠介爲臺長魏忠節首六垣因授北臺熹宗以蜀事見知時客魏孽芽人方安璫學程已先知踣踏致慮矣葉向高趙南星左光斗求去抗疏留之迨璫肆逆焰楊漣首擊程奏直漣而特糾璫朝野震恐民生日瘁分符者多貪黷程推源銓政奏劄謂選舉陵遲廉耻相冒外吏必載寶而朝缺定于先籤掣于後名器可假也邦本亦宜恤也今大小臣工蒿目腐心無過

邊事臣以爲東西交訐其禍顯蚩蚩下民無聊思亂其禍
隱隱禍突發殆如川潰收拾爲難何如早計于賢守令以
善其後哉嗚呼厥後流寇燎原之勢學程於時已早見及
之而無如置若罔聞何李邦定戰歿必爲之立祠血食且
曰恤死厲生當今急著也亮節卓識一時無兩逆璫側目
久必欲與黃尊素李應昇同致死地削籍奪勅正禍不旋
踵會璫勢落詔起用而已角巾野服歸老杜門壬申流寇
入西鄙王澤守造廬請方畧指畫防禦如令安岳時去郡
二十里無寇患軍事旁午庫藏如洗首捐數百金爲倡曰
寇退吾猶得食其餘不爾齎之糧耳然日以數年前不幸
言而中怒焉不甄釋出則憂其民處則憂其君蓋嘗以天
下爲己任也年七十卒於崇禎八年秋著有西臺奏議等

澤州府志

卷之三十六

節行

二十四

三卷

張光縉字璇源萬曆辛丑進士弟光前在銓曹十年無所援
引歷平進終陝西右布政時兩賢之督崇文荆關稅以卹
商名知廬州令奸民赭衣行市多格心者外艱補松江有
弟爭蔭輦金擠兄力拒直其事董尙書其昌有此判南山
不可移頌聲寧獨麥雙岐之句備兵霸州薦邊材改遵化
斥債帥逐崔呈秀私人賁緣偏將爲中官中傷而罷懷宗
立大璫誅起磁州已而擢布政黨人修舊愆謬加浮躁言
官白而止移會嘉調商雒遷山東右布政未行寇壓境光
縉以爲商乃西安門戶力禦之尋加陝藩因所屬不戒掛
議歸居鄉好義甲申後杜門不出而卒五子其四俱知名
張光前字爾荷州人萬曆庚戌進士知蒲圻縣補安肅民咸

立祠擢吏部驗封主事歷文選員外稽勲郎中時吏科魏大中御史李應昇論南樂黨魏闖後先削籍而高趙楊左諸公悉踉蹌去國部署一空時天啟四年光前在假吏部尚書趙南星起爲文選郎中甫就職上疏力爭云臣若緘默不言爲苟免計是賣友也賣友卽欺君臣安敢賣友欺君令皇甫規笑人千載之上哉是時忠賢假廷推謝應祥事矯旨切責南星光前抗疏曰南星人品事業昭灼人耳目忽奉嚴旨責以不公忠臣竊惑之選郎尚書臂指南星所進退臣實佐之功罪與共乞先賜罷斥廷推事實夏嘉遇非光前也亦被旨切責尋以推喬允升代南星削侍郎陳于廷籍又抗疏曰會推尚書于廷主議臣執筆謹席藁待罪一時目爲東林黨人遂貶三秩調外明年光前兄光

縉爲右布政使治兵遵化闖黨門克新劾之亦削籍兄弟並以忤闖去見稱于世光前操行清嚴崇禎元年起光祿寺少卿不赴三年起太常已復進大理少卿累疏乞休卒於家

王允成字述文州人萬曆舉於鄉除獲鹿知縣以治行徵授南御史首論遼左失事諸臣請正刑辟熹宗初兩諭罪李選侍大學士方從哲封還之允成陳保治十事中言張差闖宮說者謂風癩青宮豈發風之地龐保劉成豈並風之人今鄭氏四十年之恩威猶在卵翼心腹實繁有徒當思所以防之比者聖諭多從中出孰若事無大小盡歸內閣且借聽貂璫未必無熒惑至元輔方從哲屢劾不去陛下於選侍移宮後發一勅諭不過如常人表明心跡耳從哲

輒封還至封后之命都督之命貶謫周朝瑞之命何皆不封還司馬昭之心路人知之矣天啟元年請卹先朝直臣列楊天明等三十六人以上從之又陳任輔弼擇經略愼中樞專大帥更戎政嚴賞罰皆經國大事末言陛下孤立禁中先朝怙寵擅權諸閹與今日左右近習互相忌嫉恐乘機肆毒彼此相戕切應防範俾聖躬皇弟並高枕無憂斯根本至計時逆閹劉朝魏進忠與乳媪客氏相倚爲奸卽抗疏歷數其罪略言劉朝客氏魏進忠用事關睢好合曾幾何時而三宮有寂寞之恨范氏之得寵何時選入而突然有慧妃之封且劉朝輩初亦不預外事自沈滄邵輔忠導之遂恣肆無忌二豎招權納賄作福作威二豎弄權於外客氏主謀於中王振劉瑾之禍將復見今日進忠者

忠賢初名也封章數十上直聲震南臺會興鈎黨獄正人相繼駢首庾死允成抨擊婦寺固世所指名四年吏部尙書趙南星調允成於北御史張納劾南星調允成非法遂除名後給事中陳維新復劾之詔提問坐以贓私矯旨削籍歸而未罹于難幸也當三案起衆君子持論嚴決不無好盡允成封事及之大旨與高弘圖張愼言後先同符頗折其衷而壯維城一歎內拳拳以保護皇五弟爲豐枝強幹足消窺竊之奸時客魏蘂芽初萌已卓見及此矣莊烈帝初羣賢賜環御史牛翀元力言其忠蓋有社稷功不宜永錮命簡原疏且曾嘗請保護識其名詔還北臺未任卒吉水南臯鄒公序南臺奏議云四十年間一序張毅敏公今又序侍御澤國何多賢也時論乙科居言路如允成者

其讜直可仿瓊山海忠介云後翟學程救楊忠愍漣而請
誅魏忠賢一疏亦屬乙科澤之羣賢於勝國時咸騰蹕天
壤忠義舊邦氣類是感宜精英之奮出也

蔡勲字堯宇州人萬曆中歲貢授安邑訓導崇正學敦節義
縣令劉弘化雅重之稱其德學兼優三載遷鳳翔教授文
教大行逾年遷山西行都司天成鎮遠兩衛武學教授遂
掛冠歸以經術誘後來士林重其論著尤孝友事寡姊終
身不怠與人緩急可託著綠葉堂集卒年七十有八

程式孟字泰雲舉人少孤貧族兇螫之跳而免忍饑不食他
食浩歌力學於世俗不屑屑介意初教諭臨汾却贄清學
田以養士擢知陝州屢抗御史嚴實首法以清盜源治兵
防河寇不敢渡入爲廷評遇東廠賄搆之獄慨然謂彼殺

澤州府志

卷之三十六

節行

二十七

人而我操刀必不爲力雪誣陷極刑者十數案雖刑尙書
無以難遷營繕郎攝虞衡其綜理酌核灰鐵等事猾吏爲
咋舌任事精敏而灑然無私方貧時居一小樓嘗書壁云
卞和之足人皆憐之吾謂其不智王可終見體無全歸故
君子重內而輕外貴已而賤物官至隴西僉事

張光奎字聚辰養蒙子以任子五遷守辰州能其官仕至山
東右叅政初擢山東運使稱廉敏加叅政仍領鹺事後忌
者中考功法罷歸崇禎五年流賊再犯澤州黨數千人壓
大陽鎮光奎方里居與兄守備光璽千總劉自安等率義
子門徒出家財倡義拒敵相持五日頗有斬獲已而賊益
衆環營四面圍困八日援兵不至城陷光奎身被重鎗並
死之其子茂貞茂恂從死難事聞贈光祿卿光璽等贈恤

有差官兩子順天教授季子茂和蔭職歷工部員外入
本朝未仕

孟兆祥字肖彤州人舉進士官評事歷吏曹至刑部右侍郎
以劾魏忠賢削籍懷宗嗣位起太常少卿晉刑侍李自成
犯都城啣命守正陽門賊至冒刃死門下妻何氏聞之立
死子章明字伯昭癸未進士甫觀政難作殮父骸訖亟歸
訣其妻王氏曰吾往從大人不忍大人獨死也王曰爾死
吾亦死章明俯首至地曰謝夫人死夫人盍先死盡靡僮
奴出留一婢侍視王投繯提筆作詩已復淋漓書壁有侮
吾夫婦屍者必爲厲鬼殺之王絕舉屍置扉上加命服又
舉一扉列王左呼婢曰吾死置其上遂衣命服縊而死南
渡贈卹 本朝褒忠與范吳橋等同予祠給地錫謚兆祥

澤州府志

卷之三十六

節行

二十八

忠靖章明貞孝

州志曰兩孟公遷籍交河原澤之大陽里人州祀鄉賢
儼然同列而省志傳人物未及之其大節爭光日月固
無待一隅紀載然先河後海可忘所自哉竊取修武鄧
州紹武梁溪並載韓愈李綱之例表出之稍寓闡幽微
尚爲是邦補缺失云

王采字拱垣忠顯子舉進士偕姪緒宏紹承家訓力學志古
時號王五經初知蠡縣飭守具穿濠築城以備邊未幾邊
兵數萬薄郊關采畫地堅守多殺傷敵益衆四面環攻力
竭城陷身中十餘創被執脅降抗言城亡與亡殺則殺耳
毋多言亂刃交下立斃一門二十餘口同殉戊寅十一月
十日也侍郎吳阿衡督師盧象昇死後采復繼之按臣劉

呈瑞上其事緒宏伏闕請卹得旨贈監司緒宏亦甲申死節

丁泰運字孟尚純謹厲行有名諸生間崇禎十三年成進士知武陟縣調河內本經術飭吏治有廉直聲時劇賊蔓延將渡河文武悉望風奔竄大憲有乞哀馬首者泰運獨守南城戟手面罵日夜修戰備登陴慨慷早以一死誓城頭甲申二月十六日賊首劉方亮者引衆長驅薄懷慶內應發城陷泰運方督巷戰倉皇竟爲所得擁見方亮抗聲詬詈使跪不屈燒鐵鎖炙其膝膝焦爛終不屈惟呼號皇帝其知小臣以封疆死賊手乎命掖之出索金不得越三日知不可回遂遇害治所官民立廟以祀並殉節前令王公漢配列一堂額曰二難祠血食至今

澤州府志

卷之三十六

節行

二十九

前知州南城徐芳記流賊破河內縣令丁大罵被磔乘馬甚駿賊將騎入縣至堂下大嘶人立狂逸不可制竟跳擲以死贊曰本自可生亦知無責悼此傾崩忍忘驅策彼肉則糜我心斯石是馬是人大河以北

王緒宏字思永進士有雄才與叔采齊名授知真定縣未任甫抵里秦寇作勢已不可爲慷慨辭家廟入山僞官聞名迫致欲加冠服先期已薙髮至則露頂示曰此髮可斷此頭寧不可斷乎賊語塞去旣托跡道院久之展轉遯荒就同年生朱廷壻密謀破賊解州城圍同心仗劍率義士門生屯東狐嶺村爲滅此朝食之計無何賊黨張元錫等突於甲申十月四日變起肘腋挾之從不屈先殺廷壻緒宏大罵遇害

同死者原沭陽知縣程接孟以下十八人接孟偕弟式孟以舉人歷官知名于時

陳三樂秀曾孫秀舉人材任西鄉典史棄官家居三樂承遺緒隱居自甘時年荒流亡者多家故貧減食以食餓者每令息槐陰下飯以遣之往來不絕至今坐石宛然也子經濟諸生薦孝尚義有質訟片語平之且有寧爲刑罰所加弗爲陳君所短之議孫昌言昌期別傳

國朝苗胙土邑人朝議煥子明天啟二年壬戌進士官農曹理新餉二十七萬人咸飽騰陟陝西關南道布政司叅議再陟湖廣荆南道按察司副使時流寇數十萬由晉豫入楚戕吾民如薙草胙土且戰且守搶攘中修城隍築砦堡多爲先事謀賴以全者不乏有解鞍錄詳述其事既陟僉

澤州府志

卷之三十六

節行

三十

都御史撫鄖陽是時朝廷方以辦賊責胙土胙土亦以辦賊自任忽奉詔招撫郡吏以輕冒出被繫言者以勦撫失策落職

興朝徵撫南贛抵南昌病革謂諸將曰贛城計曰且下幸免焚戮遂卒與兄河陰令有土金吾使廣土殊友愛凡審敵量勢大帥宿將不能過居撫仕蕭然布素數有德于鄉襄鄧之變晉人賈於其地者邏卒指爲賊多閉園囿中至則釋數千人孫督師白谷轉戰中州檄澤潞輸粟軍前吏民憂惶緩頰白谷得齎及境而止汾陽朱之俊傳曰胙土轉饟百萬兵事日棘戴星援枹寇亂彌甚諸葛無補于漢余闕有負于元千古同恨所可異者曆數遞更何代蔑有或敵國強藩漸而改玉未有一夫作難六合土崩如有明

之亡之忽焉者也釁起于流賊賊起于加賦賦起于防邊
宮中府中秦越異視此相彼將痛癢莫關外臣股民脂以
潤身家內臣挾威福以壅視聽天下嗷嗷淪胥以亡耳惟
是封疆之臣上馬擁緄滕下馬拯凋敝拮据捋荼終歸罔
濟發言盈庭誰敢執其咎如彼築室于道謀自用不潰於
成悲夫所著有漢濱舊話新餉志解鞍錄撫鄖襍編文鈔
疏稿等集

陳昌言字禹前前崇禎七年甲戌進士由樂亭知縣爲御史
敢言出巡山東嚴戰守以禦寇尤多彈射迨事

本朝用原官視學江南稱知人終養奉母范至孝與弟昌期
友愛家無分財昌期亦父事之築菟裘以待予告泉石間
怡怡如也著述先草山中集斗築居集若干卷子元學於

澤州府志

卷之三十六

節行

三十一

叔昌期順治己亥進士選庶常性樸素有文名承重歸卒
於家

張京字穀臣號綠雪前舉人知高陽縣勲貴二十四家倨橫
京力折之會獻俘請減死數千人善河渠屯田兵刑算數
荒政之學調雄縣浚何承矩淀水卽直沽趙北口也賊至
乘城固守城不陷撫臣何謙上其事在甲申前入

國朝知當塗縣咸理擢工科給事劾巡方三御史不職御史
啣之喉論當塗卸代不清赴質無左驗坐誣者罪尋議罷
巡方自京始也以父老侍養卒於家 州志云按京所交
皆一時氣節才士如丁泰運王采趙嗣美孟聖教周圖駿
董緒楊世美趙日暉崔玉美彭孔比蘓寰及其兄綸此十
二人者或以節死或以才名或沉淪縫掖或錮癖煙霞京

每亟稱之何多賢也其行事可見者已登撰述其他落落姓名恐與蠹簡同盡因牽連書之

陳昌期字大來貢生有學行少與兄昌言築堡禦寇幾瀆於危後大同姜瓖之變其黨張光斗來據州以書招爲登樓峻拒歲稔倒困以給且焚負鉅萬券鄉人爲立碑頌德將聞之當事請旌急馳止之爲善無近名尤不可及也其隱德有一時比之陳省華長子廷敬官大學士諸子及孫皆以科名爵位顯

毛一豸字香林順治丙戌進士性廉潔能忍艱苦官戶曹監淮安倉有羨額隨乞運通州收軍草數百萬束輒籍草以居不辭鞭撻

世祖章皇帝東巡目擊其勞瘁以裘帽榮之尋以京察進郎中

澤州府志

卷之三十一

節行

三十二

督餉固原餉給軍士不少利杪忽考清官第一加三級額旌其績叅議興安佐平李來亨功最會州有火患泣下遽成疾卒卒之日至無以爲殮

孔文明字羨含邑人乙未科進士順治十三年授北直南宮令性豈弟貞良而英姿朗爽於庶事洞若觀火以故泣政明敏慈惠感民特深越三年方以行取去忽被蜚語以中有中傷之人南宮民蜂聚奔訴於臺院繼竟舍生赴

闕上聞有忍餓終日不得食者有被捶傷至不起者有被傷死而復甦者有羈囚方釋仍赴訴者號泣之聲振驚內外悲呼之狀感動路人甚至鬻兒女蕩家產東奔西馳泣道三載院駁部駁至十二案道招府招至三十詳十七年五

月蒙

恩下鑿民情始得湔雪補長樂令事白立碑名曰墮淚南宮
民亦異矣哉文明之得南宮民尤異矣越十五年致政歸
歿南宮民數百人猶不遠千里來哭葬樹碑而去傳曰斯
民也三代之所以直道而行也吾於文明見之文明介性
孤行不諧流俗知南宮時縣例斂民財數千餽長吏者名
曰填宅至則屏絕之緝逃有方一毋波及補長樂民內徙
田淪於沙糧不除舊令坐逋羈管者前後五人文明力請
豁之五人生還子興晉諸生廬墓二年有孝名

段藻字黼平進士知晉寧攝惠來滇閩告變逆鎮劉進忠反
陷旁縣兩以兵攻晉寧藻密請尚藩赴援得全城陞僉事
仍理縣事又攝歸善印駐惠州會劉復陷惠獲藻平南方
與議和藻乃拔歸無何劉復中變官兵敗之事平授嶺東

澤州府志

卷之三十六

節行

二十三

叅議以疾乞身卒於家

楊仙枝字簡人進士官檢討在館十年盡窺史宬所藏尤留
意朝常典山東試號得士丁內外艱徒跣奔喪廬墓起寒
素履亨若困人不得而親踈之介節自堅居家絕少干謁
甫壯而卒時論惜之

陳廷敬字子端一字說巖世爲郭峪里人祖經濟州諸生父
昌期拔貢生好善樂義國初姜瓖黨張斗光據州以書招
裂其書登樓與抗母張夢神授玉匣珠囊生廷敬丁酉舉
於鄉戊戌登進士選庶常繼授秘書院檢討初名敬榜有
同姓名者

章皇帝特命加廷以別之假歸奉母四載還補官轉國子司業
遷侍讀明年復設翰林院改侍講擢詹事尋遷內閣學士

充講官掌院教習

講幄初開首膺是選敷陳剴切在文字之外講畢卽侍內直以爲常母喪去位服除遷禮部侍郎

太宗

世祖聖訓總裁缺復以

命廷敬學士遷他官仍典書局自廷敬始在部絕請託禁饋遺諸曹肅然轉吏部侍郎仍兼學士職

特命督理錢法爬梳積弊竟局毋敢冒一錢者擢都察院左都御史時議以旗兵屯外城緝盜賊御史李時謙疏言不便部議非之廷敬力陳李時謙言是事寢以俗尚奢汰吏多貪濫疏言貪廉天下之大閑奢儉貪廉之根柢不儉不廉至饑寒切身奸宄卽起乞

澤州府志

卷之三十六

節行

三十四

敕廷臣詳定官民冠服婚喪之制疏凡數數上皆國計民生之大多允行焉糾雲撫負餉至九十餘萬丰采峻肅中外憚之轉工部尚書歷戶部改吏部望實日隆然性亢直始劾雲撫所知咸危之楚撫獄起忌者以姻婭牽連鈎致無所得而止因引辭以原官解任仍書局自隨越二載起總憲復爲工部尚書改刑部引律斷獄不爲深文外憂去官服除七日卽調吏部時銓法吏作奸臨選駁人到部誠當駁者先呈稿弊不得行張桐城相國致仕癸未四月拜文淵閣大學士兼吏部如故故事大臣八閣不復侍經筵兼之者桐城澤州兩相國也以內閣兼內直處密勿地敬慎自持補裨贊畫雖公子學士壯履亦不以私焉在閣六載乞歸慰留不允請益力

上諭卿是耆舊可稱全人時輯

御製文集俟告成乃行會京口張相國終於行在所

詔暨入辦事因不請俸章奏必繫

予告於銜越明年四月竟以疾終先是寢疾中官慰問相望于道嘗漏下三鼓

上猶炳燭待醫間疾狀至是

賜紫杉闕器一具賻銀千兩

特御製輓詩遣皇子臨奠加祭一壇謚文正令行人護喪歸薨年七十有五九歲時嘗賦牡丹有要使物皆春之句而聞者已驚其度量迨入官屢欲俾天下蒙其澤嘗薦戶部郎中王士禎戶部主事汪琬皆入翰林靈壽令陸龍其清苑令邵嗣堯胥擢御史屢典文衡得士如馬世俊金德嘉

澤州府志

卷之三十六

節行

三十五

張瑗王式丹極一時之選仕宦五十餘年不離文字之職

高文典冊流爲國華

御製詩擬諸姚房李杜

主恩優渥獎錫有加不能殫紀子三人謙吉淮安府同知豫朋甲戌進士館選調外壯履丁丑進士侍讀學士今爲編修所著書有手定午亭文編五十卷午亭歸去集二卷

馬如龍字乘六順治壬辰科進士授略陽縣廉明公正除溢額之糧償前官之逋驛馬久爲民害創請官養叅戎內丁殺人廉其實託爲神夢執之抵法有劫盜務弋獲伏辜任略四載上官列薦剡內擢以母年老告歸奉養所著有貽

安堂文集

王自振字鴻宇世爲大箕里人居楸木窠長厚更數世父國

賔生子二自振其次才氣奇邁壯走鄴郡經營鹽筴會懷
慶寇攘民多流亡責課閭左至兩丁辦一引公私不支自
振力請歸商民甦而商亦裕矣樂善好施子若孫咸貴顯
累贈光祿大夫

子璇字在只補弟子員能文章入貢不謁選紹父緒往來燕
趙間慷慨周難亦如其父康熙辛未蝗爲災璇輸錢數十
萬令捕瘞之饑復賑給人多賴以生太行古隘道也行旅
苦崎嶇璇謂特無平之者耳何愁行路難哉傾資築成廣
坦大衢者百二十里而遙費不訾而願力絕殊曹孟德詩
北上太行山難哉何崔巍羊腸坂詰曲車輪爲之摧是數
千百年所歎爲險艱而不易行者待璇而夷之亦奇矣凡
所以振乏紓難之舉多似此而事業亦日昌年七十卒

澤州府志

卷之三十六

節行

三十六

次子珣字玉光雄姿偉幹有武畧成康熙丙辰進士事父母
以孝稱謹身不匱先意無違性豁達而意氣謙冲常有以
自下解驂分宅曾不恡情陳相國志墓曰雲度霞標雪腸
月暎可以想其風致矣走內黃急兄疾侵冒霜露竟以此
致病而歿孝弟純明不媿古人卒年四十一璇次子廷揚
嗣歷官少司空得贈如其官

廷掄字簡菴號起巖璇長子詩文清簡如張伯雨孫太初由
太學生除山東青州通判七年弭盜安民著有勞勩擢戶
部員外郎轉本部河南司郎中農部推重授福建汀州府
知府遵父訓粒粟寸帛悉取給於家值歲歉設粥食民全
活甚衆修文廟置學田濬城河瞻孤獨以薦去民繪像祀
之晉山東鹽法道大蘓商困三攝臬篆昭雪沉冤丙戌丁

父艱回籍遇戊子旱荒復煮賑賙卹濟流民者五閱月以疾終於家年五十二子二鈞任工部左侍郎洵履清華鬱爲人望鏗候選知州淳和周謹有萬石君家風

廷揚字賡菴號松坪璇次子嗣珣生稟端重不苟言笑讀書必求根株不類經生獵浮辭卽已學使者器其風格謂公輔材也起家明經授戶部四川司員外郎轉浙江司郎中以兄廷掄出守臨汀告歸侍養跬步不離疾則顛天禱以身代己亥徃効西陲忠義夙成絕忘勞苦兼程轉餉協助儲胥葺事歸適郡邑旱歉運穀數千石散給貧乏鄉隣則計口授資俾謀生以保全之

溫綸嘉予獎以義高北嶽四字雍正元年太原等郡饑廷揚復蠲銀八萬助賑計部亦言廷揚在長蘆蠲銀十萬佐軍

澤州府志

卷之三十六

節行

三十七

需得

旨以原官擢太僕寺少卿繼轉大理寺少卿都察院左僉都御史兼理營田水利駐霸州綜理績密度支出入惟謹還京侍耕藉進退無失禮遷宗人府府丞調通政司通政使晉戶部右侍郎改工部左侍郎年六十卒於官初兄廷掄繼修郡東路廷揚完治七十餘里生平游處不褻終日衣冠端儼肅若神明而託意閒遠泊然一無所好里人於其歿釀金立祠歲時報享子鏐束修自好雅有風度己酉科

欽賜舉人

陳攀龍字雷門年十二補弟子員讀書自奮日誦于父之神主傍夜卧以髮繫案歷十七試皆冠諸生由貢中順天鄉試授江南永城縣永衝邑供帳悉不累民多盜特招練鄉

勇五十人以禦之盜遂息方以中州治行第一薦而格於議卽不復仕家居友愛彌篤時文章造就後來諸子悉有聲膠庠仲子威鳳己酉武舉授浙西督運官有司嘉其能前後凡七年漕部僉謂輓運得人尋加署守備封武德將軍

趙世楨浪井里人康熙辛卯科舉於鄉父光斗鄉之王彥方也慨直不阿而陰行善世楨生而局榦俊偉光輝四映食餼廩有名諸生間以父老逮祿養辛丑謁選授浙江淳安縣令不半載葺浮橋給孤獨裁貼解備賑穀邑有貧不能存翁姑至鬻其子婦者其夫婦泣不忍舍聞之立持金如其鬻數以予之趣吏急往曰遲則污彼婦矣安其父母全其夫婦誠人情所難以憂歸服闋得閩之南安一月亂作

澤州府志

卷之三十六

節行

三十八

迫脅不爲動大軍至始間趨營壘統軍咨叙乃請假還家遂優游里閭以疾終子五疇吟眺曦暎皆能世其家陳廷宸大學士廷敬母弟長於詩以明經司訓太原葺學舍督生徒郡守下其事爲二十七學所式繼補平陽訓導遷廣東欽州僉判上官廉其能俾攝永安西寧新興和平等縣篆咸理尋轉湖廣鄖陽別駕鄖爲衝要地軍餉取給各屬浮漢達江頗多險阻乃請折價就近採買旣省襄運又避江濤軍民稱便視守篆通渠水灌民田三千餘頃興國有滯獄久不決守因罷廷宸一訊立辨陞羅定州知州百廢具舉羅民德之未幾弟廷弼來叅議轄此州引例避次興安卒

人物補遺

忠義

衛正身字肖菴贈光祿大夫因鹺務寄居滄州素抱忠義國朝定鼎初命大臣安撫來滄有訛傳屠城者逃匿甚夥正身不避鈇鉞挺身謁 天使復曲諭百姓一郡帖然又於康熙十三年兵備周卜世奉

命討吳逆至衛輝餉偶不繼兵弗進正身適過此急出數千金充餉兵遂歡呼南征其生平義行類如此者未能殫述云

義行

衛其傑字卓萬正身子性長厚以好施稱康熙二十八年歲旱民乏食其傑捐萬金助賑鄰邑咸集炊粥不繼人給粟

澤州府志

卷之三十一

節行

三十九

一斗又多置綿衣棺槨以濟道間寒凍及餓死者巡撫于成龍聞於

朝授光祿大夫事載天津府志入滄州忠義祠有傳

忠義名臣

衛璪字文漪號慎齋其傑長子以鄉貢充滿洲教習得上考授富順令蜀自張獻忠蹂躪後荒涼滿目璪至以招集流亡爲己任出私財築城郭葺廡宇立衢菴建學校繕樓櫓列津梁百事具舉俗善訟璪以至誠相格有難決者立剖之邑人號爲神君暇則訓課生徒敦崇實行政成授台州同知會

朝廷遣穆旦金世榮會督臣剿玉環山寇玉環孤峙海中難以率服璪身入巢穴招撫之不煩一兵上官嘉其能劇事多

委之立辦無少滯嘉興嘉善秀水三邑舊有鉗田一區相
爭無寧歲璪三分之積訟永息

聖祖南巡得璪政績 恩賚特優擢延建邵道卒年八十有二
事載天津府志人名臣傳

文苑

衛璠字奂魯號桐村其傑仲子甫剋成進士授華亭令華爲
江左財賦劇邑積頑成習璠至催撫並行民樂輸將風俗
丕振擢刑部主事奉

旨纂修律例書成陞禮部郎中轉陝西神木道神木五里外即
屬外境邊民耕種樵牧相錯雜馭之稍不善輒易生釁璠
開誠布公宣示

朝廷德意人民安堵

澤州府志

卷之三十一

節行

四十

誥授光祿大夫卒於官工詩文所著有逢萍詩集南遊筆記
桐村近草老莊旁註藝林粹華經義集要等書行於世事
載天津府志有傳

循吏

衛瑛字修五號箕圃其傑季子由拔貢授都察院經歷擢刑
部員外郎轉臨洮道以仁恕爲治建義學以造諸生其貧
者記其姓氏居址陰資給之凡二百餘家事載天津府志
有傳

高平縣

漢原臣周大夫原伯魯之後官谷口令稱循良子孫遷陽城襄敏傑其裔也

後漢陳龜字叔珍上黨泫氏人家世邊將便習弓馬雄於北州龜少有志氣永建中舉孝廉五遷五原太守永和中拜使匈奴中郎將時左部亂龜以單于不能制下促令自殺坐徵下獄免再遷京兆尹三輔強豪多侵枉小民龜到厲威嚴悉平理其怨屈者郡內大悅會羌胡寇邊桓帝以龜世知邊俗拜度遼將軍臨行上疏斥姦殘簡將校寬租赦罪帝悟自刺史太守都尉以下多所更易下詔爲陳將軍除并涼一年租賦龜既到職州郡震懾鮮卑不敢近塞省息經用歲以億計大將軍梁冀素有隙譖其沮毀國威挑

澤州府志

卷之三十六

節行

三十九

取功譽坐徵還遂乞歸田里復徵爲尚書冀暴虐日甚上疏言其罪狀請誅之帝不省自知必爲冀所害不食七日而死西域羌戎并涼民庶咸爲舉哀弔祭其墓

晉虞溥爲鄆陽內史多惠政有白鳥來集入祀廟庭

郗鑒少孤貧躬畊隴上博覽羣籍以儒名仕晉不憚權逆面折王敦之奸討平錢鳳與祖約蘓峻同功累進太尉以疾乞休卒贈太宰謚文中

按鑒金鄉高平人舊志載入今已崇祀鄉賢

元魏徐招少好法律仕元魏有功進爵爲侯莊帝以爲行臺左丞尒朱兆執招械送洛陽仲遠數招罪欲斬之招曰不虧君命得死爲幸仲遠義之乃釋

卜冀州高平人安東將軍李崇客也高祖南征詔崇副驃騎大將軍咸陽王禧都督左翼諸軍事徐州降人郭陸聚黨

作逆人多應之冀州乃奉崇命往見陸詐稱犯罪逃亡願歸明主陸納之爲叅謀數月冀州斬陸送之賊徒潰散事在崇傳

蔡襲仕後魏爲齊安郡守後從孝武西遷賜爵平舒縣伯岐雍二州刺史所在循良著績忠蓋盎然嘗迎孝武子漳關以功封長鄉縣伯累遷司馬

後周李賢字賢和其先隴西成紀人其祖斌襲領父兵鎮於高平因家焉於魏孝莊時屢乘危險立戰功後周宇文泰西征時賢與其弟遠穆等密應以功授都督後復敗豆盧狼及莫折後熾授原州刺史賢雖少從戎旅而頗閑政事撫道鄉里甚得民和加授驃騎大將軍開府儀同三司當宇文泰未稱位號時讓齒而坐至原州令賢備儀服以諸

澤州府志

卷之三十六

節行

四十

侯遇禮相見進爵河西郡公後以弟子植被誅坐除名尋復官爵遷河州摠管卒贈柱國大將軍謚曰桓子端開府儀同三司從平齊戰歿追封襄國公謚曰果賢弟遠幼有器局魏正光末慨然仗節欲殲羣雄與宇文泰親遇封安定縣伯佐泰圖高歡有戰功拜大將軍除尚書左僕射遠辭曰遠秦隴匹夫才藝俱爾平生念望不過一郡守耳尚書僕射位居端揆今以賜授適重其罪明公若欲全之乞寢此授不許孝閔踐阼進位柱國大將軍遠子植爲司錄叅軍謀誅護後護并遠殺之植弟基尚主位至上柱國

蔡祐字承先其先陳留人曾祖紹爲夏州鎮將徙居高平因家焉初爲齊安郡守魏孝武西遷拔難西歸賜爵平舒縣

伯除岐夏二州刺史助宇文泰剪滅敵讎進封侯從戰力敵屢建殊功矢著可三百步與齊高歡戰邛山披明光鐵鎧所向無前敵呼曰此鐵猛獸也避之尋除開府每戰潰圍陷陣還軍諸將爭功祐一無所競泰每曰承先口不言功孤當代其論叙性節儉所得祿悉散宗黨卒之日家無餘財贈大將軍謚曰莊

田弘字廣略高平人少慷慨志立功名膂力過人敢勇有謀略魏永安中陷于萬俟醜奴後自原州歸魏以迎魏武功封鶉陰縣子三年進爵爲公授原州刺史爲勲望兼至以衣錦榮之弘每臨陣摧鋒直前身被一百餘箭破骨者九馬被十稍朝廷壯之保定元年出爲岷州刺史弘雖武將而動遵法式百姓頗安之建德二年拜大司空遷少保卒

澤州府志

卷之三十六

節行

四十一

子恭嗣大象末位至柱國 按李賢蔡祐田泓史傳中多有原州附繫之語李遠曰秦隴匹夫蔡祐又因夏州近而徙居田弘官原州詔云衣錦則三人似屬原州之高平非澤州高平也考陝西平涼府鎮原縣本漢之高平又曰原州茲閱州志三人者皆入高平姑載本傳大略亦從金鄉高平郟鑿博州高平王友直之例

唐李亮字思先隴西人唐宗裔官將仕郎祖興朝散大夫趙州平棘縣令父備上柱國銘云蒞俗製五城之錦宣威靜萬里之邊將仕郎亮幼承庭訓達禮通詩游習修常恭行孝弟情欽澹泊不事繁華隱德山泉求從散職年六十有七終於私第開元十四年二月葬於高平縣東北十三里之禮其碑文闕名

宋張維則幼修飭不苟同流俗試大理寺直驍騎尉以直諒聞受知於上景祐四年命提典五房公事由主客郎中知晉州事入謝賜紫衣金魚袋

段保試騎射異等當宋行講武之制得與選授景陵衛副指揮屢捍邊圉嚴號令繕鎧仗築城壘修屯田諸事具舉師行每身先士卒以積功子孫世其官

王友直字聖益博州高平人

非澤州高平州志載八因存之

友直年十二隨

父佐諳兵法紹興三十一年金人渝盟友直結豪傑志恢復謂其衆曰權所以濟事權歸于正何害於理迺矯制自擬河北安撫諭州縣勤王得衆數萬制爲十三軍九月攻大名一鼓而下撫定之諭以紹興年號時金人在揚州欲領衆南歸敕書授天雄節度乃張一旗大書宋忠義將河

澤州府志

卷之三十六

節行

四十二

北王九郎戰汝州大捷隆興二年戊昭關友直孤軍堅守金兵駐黃山鼓柝相聞益整暇自持淮北之戰友直母子相失至是訪得之淳熙四年賜第中都年六十一卒

金李曼爲異之孫森長子也以能賦稱唐順宗十六子福王縮之苗裔大定三年登進士第任隰州軍事判官政尚平易號稱循良長子伯疇高才能文善騎射次子中立明昌二年進士歷政平化平秀容三縣令考績爲天下最終河

東令鹽鐵判官

李晏字致美高平人森次子異孫也祖若父皆有宋聞人性警敏倜儻尚氣皇統六年登經義進士第調岳陽丞再轉遼陽推官歷中牟令會海陵方營汴京運木於河晏領之晏以經三門之險前後失敗者衆乃馳白行臺以木散投

之水使工取於下流人使之艱起補尚書省令史辭去爲
衛州判官世宗素識其才名召爲翰林詣閣謝慰勞甚悉
尋除西京留守世宗謂侍臣曰翰林舊人少新進士類不
學詔赦冊命之文鮮有能者可選外任有文章之士爲之
因舉晏曰晏吾所自識於是召爲翰林直學士一日召晏
讀新進士策至縣令闕員問曰朕思此未知所出對曰國
朝設科取士始分南北兩選北選百人南選百五十人後
南北止設詞賦一科每舉限六七十人故闕員也詔後取
人毋限以數擢吏部侍郎兼御史中丞會朝士以病謁告
世宗意其詐謂晏曰卿素剛正今某詐病以宰相親故畏
而不糾耶晏跪對曰臣雖老平生所恃者誠與直爾百官
病告監察當視臣爲中丞官吏私則當言之病而在告此

小事臣容有不知其畏宰相何圖焉旣出目送之曰晏年
老氣猶未衰初錦州龍宮寺遼主撥賜戶民俾輸稅于寺
歲久皆以爲奴有欲訴者害之島中晏乃具奏在律僧不
殺生况人命乎遼以良民爲二稅戶此不道之甚也男女
襍沓于僧人中亦未便世宗怒呼辨再三而後獲免者六
百餘人世宗不豫命宿禁中一時詔冊皆晏爲之章宗立
畫十事一曰風俗奢僭宜定制度二曰禁游手三曰宜停
鑄錢四曰免上戶管庫五曰宜興禮樂六曰量輕租稅七
曰減鹽價八曰免監官陪納虧欠九曰有司尚苟且乞申
明經久遠圖十曰禁網差密宜尚寬大又奏乞待制修撰
官更直進讀陳言文字以廣視聽二年請授沁南節度久
之致仕復起爲昭義節度明昌六年歸老詔除其子仲略

左司員外郎爲澤州刺史以便侍養承安二年卒年七十
五謚文簡

李仲略字簡之晏子聰敏力學大定十九年詞賦進士調五
臺主簿轉韓州判官遷澤州晉城令補尚書令史除翰林
修撰權領左司一日奏事退上顧謂近臣曰仲略精神明
健如俊鶻脫帽未幾轉員外郎以親病求侍特授澤州刺
史以便祿養先是晏領沁南節度澤於懷爲支郡父子相
繼鄉人榮之父喪免起爲戶部郎中時命六品以上官十
日以次對乃進言曰凡救其末不若正其本所謂本者厚
風俗去冗食養財用而已俄授翰林直學士充經義讀卷
官上曰有司謂經義不如詞賦罷之何如仲略對曰經乃
聖人之書明經所以適用乞命考官庶得碩學之士紇石

澤州府志

卷之三十六

節行

四十四

烈執中坐贓仲略鞫之當削權要皆言太重仲略奏曰教
化之行自近者始况執中兇殘狠愎豈可宥尋授山東按
察以病訪醫京師泰和五年卒贈朝列大夫謚襄獻仲略
豪邁如其父剛介特立不阿權貴臨事明敏無留滯以幹
濟稱

晁會字公錫高平人宋文元公迴之後宣和末中武舉爲太
子洗馬入金又中經義科進士靖康後淪於金生徒解散
會誘進之貧不能應舉者多資遣其在官貧薄必損俸入
以膳給歷寧鄉猗氏臨晉三縣終興平節度副使致仕年
七十八卒李承旨致美兄弟皆出其門孫國章致美外孫
教授鄉里經指授者肅然如在官府蓋其家法云所著泫

水集

王晦字子明高平人少負氣自熹常慕張詠之爲人妻與人
有私晦手刃殺之中明昌二年進士調長葛主簿有能聲
除遼東轉運司累遷戶部郎中貞祐初中都戒嚴或舉晦
有將材俾募人得死士萬餘統之送通州粟入中都通州
圍急晦攻牛欄山以解賜賚優渥遷翰林學士九月晦別
部在滄景遣人突圍召之主者不肯發王臻晦之舊部曲
也免胄出見且拜曰事急矣自苦何爲晦曰朝廷何負汝
耶臻曰臻雖負國不忍負公因泣下晦叱曰吾年六十位
致三品死則吾分詎從汝耶將射之臻掩泣而去無何將
士縋城出降晦被執不降遂就死初晦就執謂其愛將牛
斗曰若能死乎曰斗蒙公見知安忍獨生併見殺詔贈榮
祿大夫命有司立碑歲時致祭錄其子汝霖爲筆硯承奉

澤州府志

卷之三十六

節行

四十五

張奕字彥徵以廕補官仕齊爲歸德府通判齊國廢偵知有
兵二萬在郡黠者將乘衆作亂約夜半舉火相應奕乃預
選市丁校兵結陣要巷開小南門以示生路亂卒不得作
比明皆亡匿略盡擒首惡誅之會都統完顏魯捕兵至欲
根株餘黨奕保以闔門乃止承制除同知歸德尹事天眷
元年以河南歸宋改同知沂州防禦使三年復取河南授
汴京副留守同知太原尹晉寧軍報夏人侵界詔徃征至
境按籍各歸所侵土而還奏言折氏世守麟府以抗夏人
本朝有其地遂以與夏夏人平折氏邱壘戮其屍折氏怨
入骨髓而不得報今復使守晉寧故激怒夏人使爲鼠侵
而條上其罪欲開邊釁以雪私仇耳今可徙折氏他郡則
夏人自安朝廷從之正隆間同知西京留守大定三年徵

爲戶部尚書甫視事得疾卒

張翬仕至臨潢路同知轉運使忠信敦篤綽有吏才

趙楠字廷幹擢進士第天興元年爲刑部郎中時右丞相延安郡忠正王僕散端之孫忙押門定國軍節度納坦出子也與兄石里門及護衛顏蓋宗阿同飲忙押門詐以事出投北兵尚書省命楠推其家屬及同飲人是時上下迎合必欲以知情處之忙押門妻皆被訊掠其母完顏氏曰忙押門通其父妾父殺此妾忙押不自安遂叛求脫命而已委曲推問無知情狀省中微聞之召小吏郭從革諭以風旨從革言之楠方食擲七箸於案大言曰寧使趙楠除名亦不能屈斷無辜人遂以不知情奏且以妾事上聞上曰丞相功臣納坦出父子俱受國恩吾已保其不知情也立

澤州府志

卷之三十六

節行

四十六

命赦出之人胥謂楠有于張風

楊公恕恭儉畏慎及受任事無不舉仕至順天軍節度同知有能名

張師穎官震州均徭便民調解州沁陽令擢御史以明敏見稱授西京巡警使糾治畿輔人畏其嚴歷武寧軍節度使卒于官

路元剛果不撓爲省曹尚書郎五典郡事類以鷲擊豪猾見憚以路包拯呼之累遷河南按察轉運使

張國綱外柔內剛事不避難爲濮州刺史死於王事

元張寶中統時爲永興路百戶會江上寇警命寶統兵以禦檄至卽束擔以行時正元旦不少留滯立擒渠魁致闕下遷都指揮僉事家居以孝友稱建寧鄉舊有明道程先生

鄉校遺跡寶修復之建寧文館以教就里中子弟
李純仲紳子幼負耒耕鋤能修父業中統庚申詣京辯論雄
偉每傾座客執政者嘉之授中書遷臨漳簿

宋翼舉茂才異等任永寧主簿政肅刑簡至治中擢翰林修
撰改御史豪右斂跡憲紀貞明所條奏多稱旨官至淮西
廉訪

石末宜孫本契丹人高平縣東有石末里連野狐嶺卽其鄉
祖爲元開國勳臣中統中襲爵守處州福建妖寇起宜孫
屢擊走之遇事則智勇奮發撫民則愷悌仁慈以爵讓弟
而退居天台與搢紳爲文墨交明劉基碑文云基集中多
有與石末公往來詩

賈魯字友恒幼負志節長謀略過人延祐至治間兩以明經

澤州府志

卷之三十六

節行

四十七

領鄉貢授東平路教授累遷戶部主事未上一日覺心悸
尋得父書筆勢顛縮卽辭歸比至家父已有風疾未幾卒
艱起會修三史召魯爲宋史局官書成遷宣撫幕官最遷
中書檢校官上言十八河倉近歲淪沒官糧百三十萬斛
中多爲豪強兼并宜先正經界書數萬言切中其弊俄拜
御史遷山北廉訪復召爲工部郎中言考工一十九事至
正四年河決白茅堤並河民居昏墊命魯行都水監魯考
察地形徃復數千里備得要害爲圖上進二策其一議修
築北堤以制橫潰則用工省其一議䟽塞並舉挽河東行
使復故道其功數倍會遷右司郎中未及竟在右司言時
政二十一事皆見舉行調都漕運使復以漕二十事言取
其八旣而河水北侵安山淪八運河延袤濟南河間將隳

兩漕司鹽場實妨國計九年脫脫復相論及河決思拯民艱乃集議取其後策與魯定議且以事屬魯魯固辭不許十一年詔魯以工部尚書總治河防授以平章領河南北發汴梁大名十三路民十五萬廬州戍卒二萬供役大小軍官咸稟節度便宜興繕七月鑿河成八月決水故河九月舟楫通十一月諸埽隄成工畢河復故道上遣使祭河伯召魯還京魯以河平圖進超拜魯集賢大學士賞予金帛勅丞旨歐陽元製河平頌以旌脫脫功宣付史館尋拜中書左丞從脫脫平徐州同總兵官督戰魯誓師曰吾奉旨統八衛漢兵頓兵于濠七日矣爾諸將必以今日已午時取城然後食魯上馬麾進抵城下忽頭眩下馬且戒兵弗散病愈亟却藥不肯汗竟卒于軍中年五十七護喪還

高平有旨賜鈔五百錠子積

賈五舍魯子也據明弘治六年癸丑邑人進士郭芝撰高平毛令忠重修長平驛碑記曰驛舍皆元左丞賈魯故第材魯前治河以功拜左丞當時爲之語曰賈魯治黃河恩多怨亦多萬年千載後恩在怨消磨賈之功亦偉矣賈子亡其名其曰賈五舍者太祖皇帝天兵南下集鄉兵拒敵死之家屬悉遭殄戮建驛之曰撤其故第之材充焉故驛舍之壯麗者皆賈第材也賈子雖以不服死在于所事則忠且義矣賈父子死矣而故第驛舍矣人知賈第之侈而不知賈之功可以居之人知賈第之毀而不知賈子之忠義足以不朽晉王殿下亦曰千載應傳賈魯名想當時亦有爲殿下言及此者賈之功固難能而其子之忠義亦未易

得其事皆不傳者以其敗耳嗚呼可以成敗論人物哉茲因驛舍之復特表出之以爲來者告 按魯有子積是否五舍不可考州省志皆作賈五會乃魯子明時靖難兵下五會集鄉兵抗拒因致全家殍戮謂其忠於建文矣夫魯有大功爲元名臣其子拒明應得盡節於所事若云靖難兵下而死殊屬少據今見長平舊碑幸其跡具在而五會者五舍之譌也記云亡其名兵燹之餘自應漸滅而殘碑斷碣尚覺昭然故辨正之

明王燧舉人敬子由南城兵馬司至陝西苑馬正英宗時官太僕寺丞以勤濟恪丁內外艱六年廬墓詔表里見劉定之曾鶴齡文

崔謙舉人知吳堡縣清慎惠兼之宣廟獎諭遷知懷慶府

澤州府志

卷之三十六

節行

四十九

郭質兄文省試第一質先舉於鄉知永壽定興兩縣有廉能名憲宗賜清官勅褒之擢知光州以上中下三則均徭列郡取式卒于官有遺愛人名宦子定進士高第宰職重其文歷知通邳鄭三州惠政著聞民立祠比父質定子坤舉人次城安州判官各有令子別傳

畢璽成化庚子舉人知任邱剛果有爲城隍橋道具舉值邊警民恃無恐轉德州及揚州府同知所在有聲遷戶部郎中總理遼東糧儲轉兩淮鹽運使清操惠政歷久不忘祀兩州名宦家居杜門著有石屏文集家乘餘錄
牛輔舉人知安岳縣不以和平易介節不以嚴毅傷恩私祀名宦其子姓多有立坊表者

郭淳成化癸卯舉人授西安同知清慎不苟後以邊事死難

申良字廷賀弘治戊午舉人授招遠縣闢石田千餘頃山東盜起豫爲戰守計賊至追擊至黃縣俘斬數百已復破走之孤城獲全又歷知良鄉諸城二縣良鄉權貴往來之衝無藝要索悉拒之遷安吉州錦衣葉瓊倚逆闖錢寧勢占民田良奪還民瓊因嗾奸人誣奏卒白遷常州同知招遠民懷其德圖像祠祀入爲戶部員外郎會爭興獻禮與廷臣伏闕詔獄予杖創斃者編修王思等十六人良其一穆宗贈光祿寺少卿

郭鑿字允重祖定成化乙未進士父坤弘治己酉舉人鑿正德己卯以春秋魁山西嘉靖壬辰以春秋魁天下授行人歷工禮刑戶四科給事建言持大體劾官邪先其惡且要不毛舉細過變亂成法以博名高所言如重邦本一疏論

澤州府志

卷之三十六

節行

五十

都御史工部尚書不職世宗是而行之丁內外艱賜諭祭歷官工部右侍郎摠理諸大工如蘆溝橋元雷殿寶泉局所鑄嘉靖通寶其最著者轉左修京師外城工竣賜金帛食尚書俸著有一泉稿

郭鑿字允新城子與從弟鑿同舉進士鑿博雅練達官副使鑿有內行束身嚴待物恕生平未嘗臧否人人有言頷之而已及投以艱大身任不辭無所瞻徇由翰林至工部右侍郎分校主考並得士居官曰守一編爲文典核詩自成家有文集若干卷

趙軌嘉靖甲辰進士官工科時內豎煬竈私置禁器軌抗疏發其事謫封邱縣丞尋奪職終世宗朝不之用也隆慶初太宰楊博遵遺詔陳建言得罪者三十三人謂俱忠謹爲

國宜及時還官錄用詔起靴禮科值郊祀上忽戎衣出靴
遮道極諫又論孔庭從祀宜退馬融王弼而進先臣薛瑄
上嘉納從之官終太僕寺卿

張雲路字伯登師郭鑿負才識敢爲成進士官行人奉使周
藩周旋中禮一無所取爲御史巡關東振國勢懲貪帥邊
境肅清已按南直隸嶽嶽有風裁諸道惕息會趙文華欲
攘征倭功忌撫臣曹邦輔先上捷書媒孽遣戍雲路爲抗
章論奏不報未及代卽爲忌者詆謫去官

馮顛嘉靖丙午舉人慷慨厲行知武邑歷南戶部郎擢遼陽
僉事所至携一蒼頭給使令官舍子然其刻苦有寒士所
不能者

王雲衢字道亨貢生判順德曾條上馬政事九年去崑山歸

澤州府志

卷之三十六

節行

五十一

震川有光繼之其廳右記云順德府復設通判一員責以
馬之政職隸太僕國初使民戶養馬故曾見邑中趙少司
徒亟稱前判王君賢因訪王君行事一老卒謂王君於馬
政不孰何然不捶楚人似君侯而郡人稱遺愛莫逾王君
蓋雅用簡稀爲得職輒以比跡雲衢自喜雲衢之不因弊
政擾民可知已矣遷鎮江同知上防倭十策不報歸田後
臺司薦晉布政叅議

郭東嘉靖丙辰進士授刑部主事時以親老不能之任疏請
終養里居十八年士大夫稱其孝歷太常卿淡泊自奉恂
恂下人歸建石堂會集士講學迄今邑人猶有能道其恭
勤者

常存仁字靜甫嘉靖乙丑進士知邢臺有囚婦誣坐殺夫罪

存 廉得其實不以獄成枉法惡出之教諭趙歿旅櫬不
得歸損貲助其喪擢知彰德府江寧王驕縱虐民存仁請
論如法錮鳳陽民歡呼載道府有贖鍰萬緡存庫不取及
兵備榆林後官遣吏津送仍却之在官二十年不名一錢
囊無餘資里無餘產以清白稱

蘓民牧字乃溪厚重寡言爲名諸生登進士知長安縣擢給
事歷山東川陝三任監司二十載聲績甚著自律一如寒
素鄉評先達之清望長德首民牧焉

劉虞夔字和字七歲能文登進士甫弱冠博極羣籍居翰林
二十載內外制誥悉稱旨與黃葵陽齊名在講筵多啟沃
兩典春闈蕭良有鄒德溥皆其所得士以宮詹學士歸養
卽家詔起疏辭有親衰不仕官病則休之語林居以國本

澤州府志

卷之三十六

節行

五十二

爲慮著漆室葵忱未上卒有宮詹文集

馮養志字若曾顓孫進士知洛川不事苛察折獄惟良撫民
有恩意歷任邱遷文選司員外郎以事調判長蘆終兵部
郎中或蹶或起雖與時齟齬而謙謹慈和人樂就之

李向春貢生知西鄉性介孤行忤上官罷職行李蕭然民遮
道騎不得前邑祀名宦孫棠馥舉進士別傳

楊暄字杏園崇禎十三年進士知渭南縣歲大凶力爲拯救
緝奸人斃於杖以杜亂萌民獲安考最關中第一遷兵曹
未行時十六年六月李自成攻潼關軍帥白廣恩開門降
賊旁邑宰皆望風遁去將狗渭暄籍子弟嬰城固守士知
必死無叛心無援城陷被執賊露刃脅之不從索印不與
遂遇害顏色如平生暄少治春秋爲文幽深澹折晚歲登

第乃能奉職砥行卒橫尸城門遂以身許國之義可謂不負所學矣卹贈陝西按察僉事蔭子廟食渭南

國朝王邦柱字石寧前進士入

國朝官大理卿出入侍從著作頗多亂後失編歿贈工部右侍郎卹典甚備

李藻字鑑明號慶餘前天啟辛酉舉人知保定縣調大成知涿州甲申以前擢兵部職方司員外以知兵稱遷遵化監軍道屬弁以金錮屢中詭進蜜立糾之調湖廣沔陽棄官將歸會大將軍兵南下委署按察使授辰常道歷順慶叅議襄陽副使內陞太常卿順慶試士賊忽至諸生洶洶將散藻爲提調以整暇畢事在襄陽議復均州襄陽城門久燬潛度尺寸爲門夜載入翼日屹然鎖鑰內徵京師終刑

澤州府志

卷之三十六

節行

五十三

部侍郎加尚書服俸以疾乞休卒於任遣官護喪歸卹典有加

崔子明字見心進士父堂患痺以子明累年視藥裹竟忘其病比子明捷音至忽躍起步廳事前若有神掖者知葉縣遷計曹視通州倉盡職卒於官著有讀書聲經國大業丹頭地等集受學從弟光嵩副榜知溧陽縣歸而讀易賣藥畢振姬與友善歿誌之

畢振姬字亮四號王孫又號頡雲柳村里人世爲農八歲時卽向學自炊自汲得書輒讀十行俱下古廟狐鳴嘗夜分神燈徹曉同舍兒妬其勤爲扁書割硯明季寇起顛仆營貸以終喪崇禎十六年壬午舉鄉試第一人又五年

國朝順治丙戌成進士十轉官階終通奉大夫湖廣布政使

年四十八致仕又二十年卒年六十九振姬孤僻介特有
吏才力學六十年如一日初教授平陽所在有燭跋墨瀋
以其能師移國學公餘坐卧黃埃黑煤瓦燈布被中伏讀
不休一時目爲有官僧癸巳分守濟南方用兵三齊荒旱
寇攘俶亂城門不啟振姬晝夜馳三百里設法安插流亡
七千餘人及供軍需數十萬泰山香稅充餉七千餘繼副
廣東驛傳水利節使往來如織糧砲船馬繹騷旁午始至
立約束身共十二州縣安危減費六七千有奇改浙江叅
議未幾又按察廣西平反大獄七十餘案獲玉璽將軍印
纍纍交州洞蠻胥平洪承疇節鉞西南易置三省奇其才
舉湖廣布政使專給大軍進勦餉振姬決去自破其面乘
一乳馬疾馳歸自爲教授由濟南歷大藩十年去來皆一

僕一馬所至搜經史子集以事學爲究竟居鄉遇大利害
力與排解如在官黨屬緩急以身受傷祖父母不逮養置
義田祭田役田立祠朝夕跪起上食如生時置社倉二所
首蠲穀七百石脩旱荒日帶笠自畊百畝暇卽讀書康熙
十七年以三藩故西南復用兵劉司寇健魏中丞象樞疏
檄徵不起越三年卒所著有尚書注西河遺教四州文獻
三川別志爲文堅蒼奧古太原傅山題曰西北之文有畢
解元傳

李棠馥字子芬號漢清順治丙戌進士向春孫授刑部河南
司主事出督湖南學能以經術佐風藻初同考戊子順天
鄉試所拔多名宿艱歸起荆西道是時西山未靖會大師
過郢議雜處民間棠馥力持不可徃復爭論卒請大將軍

移營郊外閭里得安堵遷陝西驛道酌協濟以甦驛困歷
本省叅政四川按察超遷戶部右侍郎謝病再補倉場改
兵右引年歸居鄉見多淹樞有至百年者出白金三百乞
長吏勸葬否則以法督之設局注藥以拯疾苦弟棠醇奉
母守堡解劇賊之圍垂老事兄如父以貢生判兗州
趙介字岸鳧進士知金壇三年政令寬大與民休息堂下絕
叫呼聲不悉蠶絲不來訟獄而閭左晏如官釜常塵視若
平常忽以里氓夾和倉米事奪職父老泣留不得相卒祠
龍山巧石亭而介身輕似葉半肩行李已渡大江而西矣
歸而老屋數椽日與故舊長吟送老四十年卒遺命不誌
不銘歸真返璞淡然俗情之外君子人與子筏舉人官臨
晉教諭一守先業

澤州府志

卷之三十六

節行

五十五

田逢吉字凝只順治乙未進士選翰林編修累官內閣史院
學士終浙江巡撫逢吉年五歲時父馭遠爲流賊所執以
刃脅之號泣父旁若請代狀賊感動得無害在翰林戊戌
分校庚戌主試所拔士如孝感安溪太倉崑山卽墨武進
猗氏平湖諸公先後爲當代名臣任學士日或議出穀貸
民秋成後少收其息逢吉曰此與青苗法何異恐反累民
事獲寢奉使賑淮陽奏請寬流亡禁使逋逃者獲隨地收
養不致歸本處乏食待斃全活無算及撫浙適耿精忠變
起李制府之芳督師金衢逢吉留會城治軍務早夜勤劬
以勞成疾告歸卒於家

張彥珩先世洛陽人闖賊破洛避亂來高平乙酉登豫賢書
次年成進士授戶部主事遷員外郎出爲興化知府時寇

氛猖獗籌餉禦侮賴以底平績聞

賜蟒服擢粵東兵備道兼學使海外兵燹未靖彥珩勦撫安輯之艱起補四川糧道大軍勦水西職在運輓師徒宿飽而曾不擾民遷雲南按察司未幾擢楚藩安民察吏江漢化行兩以巡撫推乃決意投簪優游林泉年八十六卒

李棠醇棠馥弟性孝友有幹才爲名諸生以拔貢授兗州通判汰蠹役明聽斷申冤抑監視漕鹽稱平允以誥誤歸與兄白首相對友愛尤篤年七十九卒

崔涵璽戶部主事子明子綽有吏才以廩生入監得麻城令懲奸賑荒民懷吏畏滇逆未平軍需旁午無不立辦遷慶陽司馬駐劄寧夏五衛軍胥受節制乃調劑有方民若不知有兵者艱起補眞定同知分理宣鎮悉心籌畫絕不擾

澤州府志

卷之三十六

節行

五十六

民會裁缺歸不赴補

鄭俊康熙甲辰進士是時初改策論嚴我斯榜也俊少以孝友聞登第後邑侯白勸之仕以親老辭後家貧甚父促以祿養乃授海康令治處天末不獲迎養不得已涕泣履任一以孝弟化民民感之治行稱第一擢吏部主事尋遷稽勳文選司員外郎晉考功郎中力懇終養歸

牛兆捷康熙己未進士少師事傅山畢振姬文行有器識任粵西灌陽令教民敦禮讓課農桑裁成土類多造清班邑人建祠祀之著有陶史草十卷

崔涵鑿子明子以能書充史館筆扎任事竣授江南麗江通判滇變不往後補廬州倅剔漕弊著聲已而攝英山除耗羨又署合肥徵逋祛蠹頗費心力地當衝繁值歲饑設計

賑卹竟以瘁卒於官

田光復康熙丁丑進士早孤孝事母母欲復光大前人承母志專精舉子業年五十始登第令鄒縣輿母之任鄒屬衝邑號難治乃絕苞苴嚴令甲訟無寃民時有水患代民補租三百金歲饑詳請賑給不允會總河道鄒復哀請得籍粟萬石民全活無筭流亡來歸復捐粟五百石又給牛種俾來春得力田民以蘇艱歸起補蒲江地瘠民稀招徠拊循民方接踵歸樂土而復猝然卒於官

田長文浙江巡撫逢吉孫康熙己丑進士由教習授鎮海令邑濱海多潮患請米千石修築捍水隄隄成而完固民永賴之有三河水高於田舊資灌溉以久不濬淤苦旱乃令民分段挑濬未幾通利廢壤復成膏腴焉有言開荒蕩田者爲條其害力却之有請稅漁船者爲陳其苦獲免焉署鄞縣歲荒請賑勸弛海禁招商販運米至者萬餘價頓減而民以活艱起還浙署淳安不逾時以疾卒

澤州府志

卷之三十六

節行

五十七

卷之三十六終

陽城縣

北齊上官顯願輔國將軍殄寇安民有功子孫遷翼城衣冠不絕

宋何漢榮深於武畧端拱中爲殿前承旨 澤州太行路巡檢善接下對人不知有官自恨昧於文義常於馬上令人讀孝經而聽之咸平中契丹侵河北漢榮爲 鋒屢禽渠魁敗之加檢校祭酒兼中丞時侍衛王超守定州有尾大不掉之勢漢榮與楊延釗共謀扼其吭於高陽關乾興元年充山東山西都巡檢天聖中遷如京使安撫都監去任終於覃懷邸舍年七十二火屍歸骨明道二年塋本縣城西北詳進賢山長王磐碑記

元鄭鼎陽城人臯子幼孤能自立讀書曉大義旣長勇力過人善騎射初爲澤潞遼沁千戶從塔海紺不屢立戰功還屯秦中宋余侍郎燒絕棧道鼎修復之遷陽城縣軍民長官從征大理國經六盤山抵雪山舍騎徒步嘗背負憲宗以行每奮身力戰上壯之入朝問以時務敷對詳明賜名也可拔都從世祖南征攻大勝關破臺山寨乘勝獨進陷泥淖遇伏兵出葦葭間鼎擊殺三人餘遁去急詔還曰爲將者當慎重不可恃勇輕進遂分衛士三百人且戒之曰自今非奉朕命毋得輕與敵接秋至江潞將南渡鼎首奪南岸軍畢渡圍鄂州中統元年以功遷平陽萬戶至元三年遷平陽路總管平陽地狹人衆乏食鼎乃導汾水溉民田千餘頃又開潞河鵬黃嶺道以來上黨之粟修學校厲風俗民德之七年巡西川遇蜀兵戰江中悉獲其戰船改

軍前行尚書省事十三年從侵宋移鎮鄂州夏五月蘄黃
二州叛鼎討之戰于樊口舟覆溺死年六十有三贈中書
左丞謚忠毅追封潞國公

鄭制宜鼎子小字納懷性敏有器局通習國語至元十四年
襲父職仍戍鄂州十九年征日本造樓船洲地狹欲徙民
居制宜不許改授寬地居民感之城屢火或言恐姦人
乘間宜捕其疑似者制宜曰吾但嚴守備奈何濫及無辜
有盜伏近郊出城遇一乘白馬者貌服殊異叱下訊之乃
盜也正其罪一郡帖然東征請赴敵自効上顧左右曰而
父歿王事惟有一子毋使在行陣請益力乃命從以戰功
授懷遠大將軍明年幸上都舊制樞府留一員司本院漢
人不得與至是以屬制宜遷湖廣叅政上曰汝父歿王事

澤州府志

卷之三十六

節行

五十八

賞未及今已籍沒叛人財產汝可取之制宜對曰彼以賊
敗臣復取之寧無污乎上賢其守賜白金五千兩未幾拜
內臺御史安西舊有牧地圉人恃勢冒奪民田十萬餘頃
訟積年不能理制宜奉詔往按圖籍以正之訟由是息茶
鄉譚計龍者聚惡少年匿兵器爲奸旣捕得其家納賂以
緩獄事制宜悉以勞軍斬計龍于市自是湖以南無復盜
賊俄入朝使知屯田事大德八年晉地大震平陽尤甚制
宜承命存卹懼緩不及事晝夜倍道兼行至則親入里巷
撫瘡痍給粟帛存者賴之成宗素知其名眷遇殊厚每侍
宴輒不敢飲上察其忠勤賜內醞輒持以奉母聞之特封
其母潞國太夫人十年疾卒年四十七贈銀青榮祿大夫
追封澤國公謚忠宣子阿兒思蘭嗣

鄭濤襲祖職萬戶行省叅政昂霄子官河東宣慰司同知鎮澤州輕賦固圉民賴以安

明原傑字子英正統乙丑進士忠純練達名重中朝少力學器宇殷厚魁岸爲御史巡江西引經折獄健訟者亦帖服江西陳少傅德尊王家幸行儉蕭都憲維楨稔知傑合詞荐爲按察使劾寧王奠培革其護衛肅清宿弊振舉頽綱墨吏咸股慄郡守某怙勢貪黷莫敢發卒懲其奸抵於法轉山東布政晉本省巡撫吏畏民懷得撫字體繼命以部堂察吏河南巡視畿輔皆易人所難母喪去位江西盜發攻劫村邑詔卽其家起之俾往督捕悉平改左都御史時臺臣言荆襄山中流逋四集比勞王師雖已勘定續來者尙五十餘萬宜立有司以教養之軍衛以統治之斯日之

患度乎可弭上覽奏曰此事惟原傑可了降敕趣往且假以便宜之權傑感主知馳抵荆襄流民竄匿巖谷中者無筭初流寇嘯聚蔓延不絕劉千斤石和尚李鬍子等相繼煽亂白圭討之以撫勝項忠討之以勦勝而旋滅旋起言者謂刑戮過當乃用傑比至欲盡得其地理之險易民數之多寡凡窮巖僻壤鳥道羊腸人足所不經及者無不手挽繩絡而上下之於是環數千里之山勢摠數十萬之民情靡不洞悉胸中以爲可郡可衛可守可治兵可治民舊業可厚而不可析新集可析而不可薄其願版籍爲良民者得戶十一萬三千有奇口四十三萬八千有奇遣歸一萬六千留九萬六千餘戶占土給耕具請立鄖陽行都司并府衛割湖廣河南陝西地分置竹溪鄖西桐栢南召伊

陽白河商南山陽諸縣以商縣爲商州并乞添設都御史提督撫綏之爲久安長治之計一一條陳繪圖以聞報可嗣是控制巴蜀連絡秦豫屹然四省要衝國家享闢土之安黎庶知更生之樂傑之績偉矣詔書褒嘉召爲南京大司馬會以勞瘁致疾未任卒於南陽驛舍荆襄民皆哭失聲廟食各省贈少保謚襄敏商文毅輅墓志曰朝廷有重事則以任公大夫有難事則以屬公得年六十一而未竟其用惜哉

楊繼宗字承芳號直齋天順初進士官刑部貴州司主事每閱囚半觸穢庾死給食飲許令三日一櫛沐蘊活甚多決疑多所平反王忠肅翱荐知嘉興府攜一僕自隨官舍爲旅御史孔儒清軍按里酷虐甚多撻死繼宗榜市門御史

澤州府志

卷之三十六

節行

六十

杖人至斃者詣府報名孔大恨異暴其短無所得一日直入署引至卧榻惟書史堆床篋亦不鏽乃啟視之敝衣而已媿歎去豪民張紳父子劫桐鄉解絹論死賄上官張敷思反其獄詰繼宗以失主曰朝廷又詰以原告曰知府臺使語塞時閹人多橫有織造秦品者過遺以菱芡曆書索貨繼宗曰諾牒取庫鍰爲饋曰金具在幸與印券以備磨勘品愕然不敢取其家人秦寧械拷水西驛丞張俊拘獄搆其贓具奏發遣海水爲患歲費帑三千金徃治之止一千金罄石貫鐵至今塘岸如故前後再任凡九年去時以器具悉付有司卽日就道民遮道泣脫一紗衣慰留意民篋而藏之巡方楊琅列狀荐擢浙江按察使痛革中官鎮守供費數萬緡閹張貴擅用金逮問充軍中貴側目其兄

司禮張敏讒之上前上曰得非不要錢之楊繼宗乎敏懼不敢加害擢巡順天力奪宦官戚畹舊占民田還民修山海居庸邊牆東西三千里今猶完善成化時星變上䟽歷指中官及文武諸臣貪殘狀且請召還中官出鎮者治中陳翼訐其過權貴因中之左遷雲南副使命汲水百斛滌廳事而後視事曰吾以除穢也遂單騎入叛徭窟曰副使楊某來徭大驚羅拜卒撫定地產金三司使日徵作噐餽劾退之弘治中轉湖廣按察尋撫雲南三司多舊僚相見歡然旣而出位揖曰明日有公事宰相諒乃罷不職者八人改左僉都御史還臺未幾卒謚貞肅繼宗介直稜稜有風骨歷仕三十年去則挾圖書數卷不帶官司一物廉正之聲滿天下販夫牧豎皆知名其異績散見襍志中莊景云

嘉興人物惟陸贄名宦惟楊繼宗羅一峰倫曰孔子曰吾未見剛者孟子曰至大至剛以直養而無害則塞於天地之間孔子孟子之所謂剛者吾未見其人矣見其似者可矣今之君子若尙書王君度御史謝君元吉太守楊君繼宗僉憲陳君夢祥亦度乎其似者非歟尙書不得其職數月去御史三上章出百日謫去太守屢抗強武乞錢若水例致其仕去僉憲九載不遷避讒去 按明紀曰繼宗居官三十年所至民懷父母吏畏神明忠孝諒直光明磊落雖庸人孺子皆知姓名孫新民熹宗朝爲御史清節大著有祖風

李經成化五年己丑張昇榜進士陽城人有詩名才敏而工碑碣文字多出其手與沁水常評事倫同稱山右兩才子

官御史仕至陝西副使 同時又有李經正德九年甲戌
唐臯榜進士澤州人官四川叅政省志譌成化李經作正
德李經

田鐸字振之成化十四年進士歷戶曹郎命賑蜀誤遺勅書
謫蓬州知州州東有江洲八十二頃爲豪右所據奪以還
民建大小二十四橋又鑿三溪山以便行旅御史行部至
訝民寂無訟知州無冤民也太息去荐擢廣東僉事時當
閹瑾擅權動輒罰米爲聚斂計大小吏無免者鐸抗疏力
爭瑾怒矯旨言鐸理廣東鹽法簿牒未明逮赴廣未就道
瑾誅或勸毋行曰君命也行次九江遷四川叅政未幾卒
年八十二見明紀循吏傳

宋鑑字克明成化戊戌進士少有大志力學每達旦不就枕

澤州府志

卷之三十六

節行

六十二

人以鐵眼呼之知舞陽縣廉且剛尤加意學校擢御史執
法不避權要出知廬州法不徇人斷不留獄囹圄空虛貪
冒絕迹如斥馬尙書文升子守六安不職及吏科周璽之
魚肉鄉民者每行州縣孜孜問民疾苦移慶陽艱歸遇弟
姪有恩義歷仕治績爲天下最終喪後竟不出

張綸成化辛卯舉人知陝西甘泉縣值流寇亂綸令子率民
兵晝夜防禦外請援兵嬰城固守以待賊無所得遁去民
藉以安事載陝西通志

張黻字廷儀成化甲辰進士知靈壽縣清慎簡默喜怒不形
而剖斷不少恕拜御史巡按陝西有重犯當刑前吏畏避
久不決黻至立決之遷陝西副使道卒於官筭中惟俸金
六十兩而已憲長令各屬致賻始得歸葬

白鑑字孔彰成化丙子舉人生而倜儻有志節授文登杞縣
政尚寬簡績最調漢陰逆瑾方肆虐遂棄官歸瑾誅復起
洛南凡歷縣卽訟牒盈庭剖斷悉明當肅括稱治行第一
告歸百姓遮道留年九十三卒於家

王玠字邦器弘治乙未進士剛果有才而內行克敦初授刑
部主事繼補戶部督倉差能剔奸弊尚書韓忠定文稱爲
廉靜晉刑部郎中同官類用峻刻阿逆瑾旨玠獨持以平
和瑾惡思中之索瘢不得遷陝西僉事督府洪聞其賢資
贊畫瑾誅調河南汝寧時劇賊劉六踞上蔡逼汝玠誓死
守來攻城敗而奔衆欲上功玠不可以賊魁尙未殲因具
陳賊可平狀朝命撲滅之有賊黨汝人趙秀毋繫獄玠特
出之秀聞感激思効密白趙璠劉六合兵來劫玠因得先

澤州府志

卷之三十六

節行

六十三

期募死士整兵仗至則一鼓縛其渠魁解送軍門紀功官
吳玉榮索賄不應人皆優叙玠止賞綵帛銀牌亦卒不自
言也歷兵備薊州及山東叅政俱著績命勘開原執貢使
之誣不阿附人多忌之遂解綬歸卒於家

張軌字信夫弘治辛酉舉人溫良貞諒勤慎廉能知隆慶州
時武宗行幸宣府三駐蹕於境嬖倖江彬中璫張銳守備
孫璽周瑁輩要素肆橫軌一切峻絕之有皇義子馬元吉
者其姪以事屬軌繩以法無所徇馬啣之遂誣奏軌得旨
命東廠處分軌不懼竟得白巡方章綸擊節歎曰當危險
而存心不失其正當紛擾而遇事不避其難直哉守也遷
萊州府同知居萊三載才守益著卒于官

張好古字東峰嘉靖癸未進士知元城縣英毅有爲陳皇親

弟姪怙勢擅作威福執之治以法被奏詔獄謫靈臺典史
士論重之復知鹽城遷刑部主事先是陽城均徭溢額大
爲民累好古奏豁鄉里甚感德轉四川僉事益嚴重不可
犯

郭昊嘉靖乙酉舉人知淄州引水灌田決疑申枉縣舊供上
官煤炭昊請分派鄰郡不致淄民獨累忤三監司各不悅
左遷懷慶教授卒於官弟昌亦鄉薦長於文學掌故喜引
後進咸推讓之

李裔芳字南峯嘉靖十年舉人知臨潼縣治多近情不爲已
甚案無留牘而越訴者必懲一時推有司之良遷眉州知
州

李豸嘉靖辛丑進士知邵陽縣民狡悍多逋課豸催科撫字

澤州府志

卷之二十六

節行

六十四

兼行俗大變以法誅豪強邑人有豸除虎之謠累遷湖廣
按察刑清訟平以平叛人師尚詔功晉河南布政轉山東
左賑饑漑田均賦節用多美績泰山香稅久爲諸司折俸
弊不可詰豸令悉貯府庫以濟公檢通省贏餘幾萬緡歸
計曹荐章數十上詔加食一品俸年七十一卒子可久進
士歷官四川僉事

王國光字汝觀號踈菴白巷里人由明經舉北雍嘉靖甲辰
成進士官吳江令裁漕耗五萬石服闋補儀封除兵部車
駕司主事改吏部考功歷稽勲員外郎文選郎中進右通
政尋擢順天尹去無藝之征二千餘金督倉場繼引疾隆
慶初命撫雲南拜刑部侍郎晉尚書丙子予告次年召拜
吏部尚書時江陵當國國光上八事采實政禁投謁別繁

簡議調處卹卑官停加納責有司禁捕官俱有關國是尤
汪意守令方鎮所推轂多才良秩滿加太子太保晉光祿
大夫予間住已念其勞復官致仕 按主事趙世鄉抗章
言時政陰指江陵國光出爲楚長史所親蒲州張四維爲
次輔四維初附江陵江陵卒乃攻其短馮璫頗不安曾省
吾欲奪吏部約馮保逐國光楊寅秋遂揭國光媚四維私
其中表王謙爲吏部主事國光旣去馮保乃用其私人省
吾怒而與王篆相詬至相擊則國光本不以大讞去可知
至世卿之出或謂屬黨江陵然反覆傾危之士其時盈庭
而媚江陵者非一節一語所能盡乃衆口噏訛都無公是
人之多言亦可畏也獨四維初比江陵依阿澆忍於其歿
讒之不遺餘力致使其子女十餘輩錮閉餓死爲犬所殘

食亦慘切矣夫江陵亦救時相特其罪在奪情言者攻刺
遂積慙成憤斥逐專恣前人稱其功在社稷過在身家明
當中葉主少國疑天下享磐石之安是誰之力議者不察
遂并其與爲周旋者而卽以爲鄭人在此亦過矣古今是
非久而論定如國光者前以爲黨居正後以爲媚四維居
正四維又復讎攻不一途於國光又將誰屬乎國光於主
上冲齡踐祚時典銓六載無缺失歿後四十年焰息而其
外孫張愼言始得表其微於墓碑今特補綴大略卽瑕瑜
不掩何疑乎言序國光類及江陵云國光有才智掌邦計
時多所建白初戶部十三司弘治後以公署隘惟郎中一
人治事吏胥滋奸國光盡令人署職務得修舉邊餉告匱
請勅邊臣核實耗蠹遂損且畫經久策以聞萬曆元年奏

言天下州縣存留夏稅秋糧可一千二百萬石其時議主寬大歲用外計餘銀百萬有奇使有司歲徵無缺則州縣積貯自豐水旱盜賊不能爲災今一邁兵荒輒留京儲發內帑由有司視存留甚緩苟事催科則謂擾民弊遂至此請行天下撫按官督所司具報出入存留逋負實數臣部得通融會計以其餘濟邊有司催徵不力者悉以新令從事制可京軍支糧通判候伺甚艱請遣部郎一人司之名坐糧廳驗發無過三日諸軍便之本曹天下錢穀散隸諸司漫無核紀請歸併各司責成如畿輔府州縣歸福建司南畿歸四川司鹽課歸山東司關稅歸貴州司淮徐臨德諸倉歸雲南司御馬象房及二十四馬房芻料歸廣西司遂爲定制三年京察固請罷詔乘傳歸瀕行以所輯條例

名萬曆會計錄上之上命戶部訂正書成詔褒諭焉神宗初官戶部時簿牒繁冗州縣有繕書輸解交納諸費疏請裁去省繁文十三司胥稱便

張昇字伯東嘉靖庚戌進士知清苑縣多惠政會災稔留心陶氏六書以意行之後遂本此活里中饑民擢戶部調兵部員外出守衛輝衛故多大俠昇按法鋤治境肅然郡資百泉溉田部使者藉口漕運多厲禁昇抗論其利害亟令復閘民不苦旱立祠祀之比之西門豹擢陝西副使改大名舊令陽城廉昇宦學狀疏聞甫擢河南叅政卽拂衣歸時王尙書國光正掌銓部張王布衣交又姻婭不藉援也州守許維新歎爲不可及丙戌澤大疫延醫設藥發粟賑給與鄉人處温温然若不知有官者常設小庾於有司常

平倉旁救斂散積弊民大便待三黨尤篤恩誼嘗謂家政亦有王道爭時鬪智盡人之力襍霸之術也慎毋蹈此卒年八十七孫慎言官太宰爲名臣

衛心嘉靖庚戌進士授宜陽縣銳意有爲開渠灌田丈地均賦刻流澤平賦二書永爲宜陽留遺愛後調臨淄

李可久豸子嘉靖壬戌進士唐縣知縣歷河間同知遷山東按察司僉事俱有政績中與上官枿鑿謫知華州擢南武選郎中晉四川僉事自投劾去居鄉仁厚邑父子登制科者自可久始

栗魁周字汝元嘉靖己未進士好學有文爲戶部主事奉命視直隸荒條上綱要賑濟有方又督運清出江西浮糧若干由員外分巡陝西平楊師古亂轉叅議隴右鯁直不撓

澤州府志

卷之三十六

節行

六十七

御史惡之賦詩告歸邑故無誌魁周綱羅舊聞成全書著有秦中詩文集

楊樞嘉靖己未進士官給事終河南按察使在朝廷曾爭大禮在商洛擒鑛賊功爲人掠不自言在河南督京儲一無所染指士論重之

王淑陵字之義嘉靖乙丑進士授嵩縣嵩故有鑛穴羣盜藉以爲窟出沒肆奸偷淑陵至廉得其渠魁假以把摠名勒令擒勦命轉展舉發悉捕治無遺法峻而心仁民肖像祀之擢評事轉工部主事歷官湖廣叅政所至有聲

楊植字爾立萬曆丁丑進士廉介少合任益都知縣嚴明果斷夙弊頓絕郡守每以過亢抑之不屈六年遷廷評轉兵部主事守山海關卒伍無敢闌出入商賈便之轉刑部員

外歷薊州僉事河南叅議遼東副使所至稱能終養歸起
補陝西關西道加意振刷益厲清操疾革家人襍贖鍰檄
于文移中檢而怒擲之居官三十年惟打頭屋數間薄田
三十畝

衛一鳳字伯瑞萬曆庚辰進士授刑部主事遷郎中出守紹
興憂歸補青州初在比部時手定爰書廷尉無以難吏不
得因緣爲奸及守青政簡肅直指者欲中傷之東撫姚江
孫鑛曰衛青州有三不可及初筮仕郎以伉直聞守紹興
不踰時民頌茲飲此州水耳正如富鄭公之守青也直指
格於清議乃止荐擢鞏昌副使火直入犯畫策禦之捷聞
詔予金旋備兵青州劉莊靖東星方治河河決黃家諸口
請改河道一鳳結茅河濱風沙烈日不憚勞瘁以兵法治

澤州府志

卷之三十六

節行

六十八

之卒安流大饑米貴姑昂其價以徠估艘商果集民不苦
擢應天丞誅妖民劉天緒撫鄖陽開誠諭秦寇遽解散補
舊耗兵餉七千有奇晉南侍郎遷尙書改本兵連䟽乞休
未幾魏忠賢禍烈灼有先見乃乞歸會縣令建璫祠要其
註名一鳳艷然曰吾罷官正潔此身耳胡以此復相污耶
孫尙書丕揚謂天下清品有二衛指一鳳與尙書永芳也
鄉居望益高卒贈太子少保劉同升曰士大夫云夫已氏
望弗能居人先官不肯居人後見幾勇退衛公難哉

白所知字廷模號省菴壬午舉鄉試第一人癸未成進士授
禮部主客司主事調吏部稽勲父疾告歸憂愴不欲生父
慰之曰古人誰在者兒自寬勉圖報國無爲老人慮及居
喪服闋眷戀母老不赴補乃自家起爲考功蓋家起所知

始也奉母之官調文選攝選事母以年高思歸請告仍不赴官而是時太宰孫丕揚雅相愛重部促就道改文選首輔張位與太宰左又發其奸侵部權得罪去而新建持不下越半載壅滯選人數百上疏保所知始得職先是孫太宰創掣籤以示公而官司標記爲私人計所知立畫一法地煩簡者探後從公審詳咸以爲宜舉佚振滄多所開濟其顯爲名高而無實及卑鄙依倚門戶者必加裁抑銓政擴清執政張深忌之會年例事每春秋汰一二言官於外以示殿最銓臣必受意執政始敢發給事戴士衡者舊爲新建令恒黨執政代爲擊搏所知惡其儉佞竟以戴從年例張見疏愕然曰吾誤戴矣所知正色曰戴實誤公公何誤焉大銜之以內艱歸張乘間嗾戴誣奏不法皆亾風

影者郎矯旨罷其官蔡太宰國珍力辨以去就爭之蔡張兒女戚也怒蔡不附已并罷蔡未幾有妖書曰憂危竝議謂將動搖國本詞連張養蒙魏允貞等十人所知亦與神廟洞知其誣得昭雪東宮立復冠帶光宗郎位起太常卿轉光祿晉南戶部侍郎時徵解不時軍餉虧缺兵欲於祭陵譟亂所知榜部門先予糧一月停不急之請以給軍遂靖召工部侍郎遷尙書庫藏匱乏百役繁興一身肩持不阿不激人服其鎮定歲餘見黨禍將作乞骸骨馳驛歸前後里居四十年蕭然如寒生布衣蔬食閉戶却掃年八十六卒位九列歷俸八載難進易退孤清不渝楊時化曰公大節在掌銓曹時公正服人爲明興第一以彊項爲執政所嫉後以殿門功加宮保家居究心理學冀南自和順王

雲鳳後言學者推所知其醒心錄與安邑曹于忭絳州辛全等所著書同載三晉語錄中

田立家字正國端凝魁岸年十八始折節讀書力學攻苦成萬曆丙戌進士授鳳翔推官補開封善折獄遷兵部主事典陝西試掌武選留心黜陟戎政一清由汝洛兩任監司轉叅政晉按察加從二品服俸勤積貯濟荒兩河被其澤會註誤去未幾起視遼海改河南右叅議生平悃愾不事表暴年八十九卒

張志芳字廷芝萬曆辛卯舉人性篤孝友父喪三年不內居祿入悉付弟同芳終身合處知信陽時大饑煮賑躬親調度設廠凡四十更有慈幼流移二所全活數萬計救荒第一上官檄所在式之荐章滿積吏部奪之守宿州陽民號

澤州府志

卷之三十六

節行

七十

闕請留不得建祠祀之在宿州清驛傳累內艱起補滄州築城浚池屹然保鄣吏部又奪之守景州滄民亦號闕請留不報景當白蓮之變俗易蠢動至則單騎徧曉率歸田里境賴以安爲令守八年不攜妻孥止蒼頭一二人日候漕使墮水挽救易服衷衣皆大布內無寸帛漕使者歎曰眞清正人也特疏表異擢戶部員外去民又繪像祀命署太倉甫兩月積餘米一千七百石奏聞予金遷郎中督餉天津親按權量三軍戴德再賜金旋僉憲仍泣津門革船規卹解官旗甲尤至加叅議焦勞拮据釐諸弊端飛輓時至璽書褒美進叅政積瘁成疾卒於官軍民悲慟羣以白布括髮如袒免不繼剪紙爲之前此未見也夏曰瑚爲文侈其事志芳初與郡人翟學程王允成起乙科砥切建

暨翟王忠讜稱名御史而志芳廉榦獨絕以死勤事其不負用世之志三人則一矣子毓中能文學人官至鳳翔知府舉卓異卒於官

白所學字廷訓明經善屬文喜獨闢徑耻沿釘餽司訓臨汾不問贊遷知唐縣士民懷畏未幾引退所著有平陽府志語叢平水襍組

白所行字廷鵠所學所行皆官保所知兄弟也萬曆丁酉舉人任肅寧知縣地多盜所行至捕治絕跡以薦調徃例彙贖緩積穀實公帑離任缺額無能補紳民感其德代之輸不日而足比至大寧清操益堅以勞瘁卒於官歿後一棺無還期值伯兄所學官唐遣子迎之始歸塋

賈之鳳字儀虞弟之龍之鵬兼孝友知名不析著而居之鳳

澤州府志

卷之三十六

節行

七十一

萬曆戊戌進士授真定推官聞父病棄職馳七百里省視得相見訣歷禮部郎奉命教習駙馬駙馬與宮中忤掛冠去之鳳疏爭當時躉之副使潁州修芍陂賑饑民全活以萬計叅政天津監軍薊永號能任事擢河西按察卒於官之龍嗜學工詩任袁州經歷遷濟南棄去志甘泉石及卒貧不能殮著怡園草之鵬天啟甲子舉人扶伯兄柩還人哀其瘁有志河汾之學晚署河津諭亦卒于官平居造就多聞人著有詩文集

楊瀚字海涵萬曆丁酉舉人初知寧遠除土豪殲奸盜道路肅清百姓安堵起補良鄉逼近都亭稱極衝地瀚揮霍有餘強暴不得橫政聲倍寧遠晉南廷評折獄惟允及歸仁聲義問在鄉孚鄉非貌取也

王桂字高攀萬曆丁酉舉人知靈寶縣時三川大饑發粟勸賑鄰民就食活無算爭祠祀之遷常州同知權海關舟蟻集廉聲大著甫登薦剡以疾卒

王用士字旂召萬曆己酉舉人桂從子少師事桂事繼母以孝聞知考城縣有席父兄勢恣不法者懲其羽黨駭伏不敢縱艱起補靖海至則建義倉繕城垣濬河渠清郵傳邑舊無志創修之會漕艘覆城下臺使議責令縣民償用士正色曰秋水時發豈靖民是咎坐用何名有問之水濱耳使者愕眙遂疏以失體論罷郎日出縣門父老號挽莫及抵里杜門謝客督課諸子卒年六十九

楊新时期字周卜萬曆丁未進士貞肅七世孫也初任項城縣調雍邱補蠡吾又調渭南凡四縣百弊釐剔清名獨著擢

澤州府志

卷之三十六

節行

七十二

御史抗章論三案不避忌諱按湖廣興除皆關百年利弊復命謝絕竿牘甚峻熹宗朝忤魏忠賢削籍崇禎初召還臺持憲紀者十三年衣大布飯脫粟不媿祖風

李春茂字震陽萬曆甲辰進士由行人轉兵曹補虛清目軍政宿弊悉除及藩臬秦楚募兵設餉鼓鑄轉輸具盡心力以濟時艱遷順天府尹肅清輦轂彈壓豪強尋加右都御史里居時秦寇蹂躪率衆築砦以居里人寇至幸無恙鄉人德之卒年七十五

張鵬雲字漢冲萬曆丙辰進士由商邱令爲刑科給事中挺擊案起疏劾劉廷元直聲聞天下疏云張差持挺闖宮正東朝危急聖祖震動之時舉朝有宗社憂郎鄭國泰亦有家門慮廷元巡視親鞫乃平平點綴插入風癩輕輕轉語

復綴以黠猾眼目顯然伏案頗巧爲國泰護法爲龐劉郚身設心良苦而造謀殆不可掩及提牢詰而風癩破文華鞠而欽案結倡國本正論者悉斥徙察調爲張差報仇爲風癩結局不惟一時人材銷磨殆盡而數載公論顛倒無餘皆廷元爲之也吏部尙書張問達覆奏廷元始謫去鵬雲亦出叅議四川尋爲權璫矯旨削籍崇禎初起禮科遷太常寺少卿晉右僉都巡撫順天安輯百姓彈壓勲戚引疾歸當事誣以規避罷官性介不立名譽在言路持論侃侃退而焚其艸里居絕口朝政凡七年卒

白所蘊字廷徵天啟間貢少有德噐授崞縣訓導三月郎乞身歸周卹睦婣三黨咸倚毗之旣出家財佐軍興壬申寇氛初息時有被掠婦女流離道路所蘊爲給資俾歸鄉張

澤州府志

卷之三十六

節行

七十三

大司農慎言曰衛司馬之服官白司訓之居鄉砥行礪節眞後進楷模初學易於從兄太保所知孝友文章一時推重與張尙書慎言楊刑科時化齊名學使校士三人必在甲乙間後之論者不以顯晦分軒輊也卒年七十二著有閻修錄北窓瑣言

王徵俊字夢卜天啟五年進士知韓城縣崇禎初流寇至禦却之坐大計謫歸德照磨巡按李日宣疏薦給事中呂黃鍾請用天下必不可少之人亦及徵俊乃量移知滕縣繼由戶曹督密雲餉轉河南副使時河上流寇勢張甚徵俊捍衛有功遷山東叅政監其軍改寧前道以艱歸甲申賊犯陽城賊將劉方亮執索金錢抗不屈下僞縣令使嚴繫之蓋賊痛惡士大夫自宰執至度官括金皆以品高下爲率

徵俊爲人剛而廉無所得金而僞令者頗知雅重陰縱之徵俊爲其子若婦曰委贄爲人臣當國家難以身濟之事已不濟有死無二子龍御婦陳涕泣請從不許曰我人臣義不辱身汝曹無自苦遂自縊于所居之拂雲樓大書曰義無自浼身不任辱惟有一死可以報國北面再拜卒

張慎言字金銘號藐山河南叅政昇孫名諸生也工詩文萬曆三十八年進士在州縣爲循吏在臺中爲直諫躋列卿爲名臣歷事五朝遭國多難而忠藎一氣立於天地之間展轉讒慝泊然不外求而卒於病歿了生死矣初知壽張調曹縣清河工俵馬逋稅之苦出帑銀糴穀以濟民饑泰昌時擢御史言開采鼓鑄鹽法悉中窳會劾府丞劉蔚及卿班宮應震劉光復等直聲動朝右三案事起言不究張

澤州府志

卷之三十六

節行

七十四

差黨與所以全父子之情然必摘發奸謀所以名君臣之義至崔文昇投涼劑李可灼進紅丸法當駢首恩反賜金誰秉國成一至于此若夫鼎鬯爲重簪履爲輕郎神廟之鄭妃且先徙以爲望選侍不郎移宮計將安待乃以移宮不斥賈繼春一揭爲調解奪俸天啟初督畿輔屯田言天津靜海興濟間沃野萬頃可墾爲田列上官種佃種民種軍種屯種五法又以遼人入關宜招集津門以無家之衆墾不耕之田於計爲便從之嘗疏薦趙南星劾馮銓五年三月假歸曹欽程誣劾之徵贓與周宗建黃尊素李應昇同詔獄三人庾死慎言得戍肅州懷宗誅閹召還臺請京察先治媚璫者其他付考功旋擢太僕歷太常轉刑部右侍郎讞耿如杞不稱旨放歸日坐泊水園味經史久之召

爲工部侍郎遷南戶部尚書七疏引疾不允甲申福藩渡江聞子履旋殉節曰兒得死所矣不受弔史閣部推拜吏部尚書首荐吳牲鄭三俊等十七人時貴陽懷寧比周竊柄不問國事謀殺東林復社爲一綱計諸賢皆去國慎言亦因劉孔昭飛噬乞身僑宛水或云大鍼將甘心應避跡慎言曰不愛老臣餘生繼昔三君子後也因賦詩死則等死爾中間別剛愎性命由他人匪石不可轉疽發背不藥而卒年六十九當日同逐如姜曰廣高弘圖劉宗周雖後先處死不同而孤忠殉國如一轍也慎言少孤鞠於祖母爲御史時乞歸服喪三年著有泊水園集初於其家構同閣如第五倫故事團保鄉人避寇難後卒賴以免者甚衆李養蒙字育吾性溫厚篤孝神宗時辛丑進士授淮慶推官

澤州府志

卷之三十六

節行

七十五

稱祥刑遷戶部主事歷員外郎中遷承天府知府所至廉惠人樂依之艱起補湖廣副使未任卒祀鄉賢

崔時芳字冲寰神廟丁酉舉人授華陰令起補平涼所至清勤敬慎愛民如子及同知鞏昌軍民咸得所解組歸與弟白首友愛善樂育人後進游其門者多奉爲楷樞

張登雲號月亭鵬雲兄任江山縣主簿遷遂平縣丞署確山篆廉介不染邑有解糧賠累之苦力爲革除陞京山衛經歷告歸先是赴銓掣得山陰吏詭以江山易之同鄉白孕謙司寇曰宜急辨登雲曰摠一簿耳若辨吏當何罪置之人服其量後以孫爾素贈刑部侍郎

張慶雲字肇興天啟丁卯舉人殉難贈承直郎宛平縣知縣王國丞字宗孔天啟間貢早慧名神童事繼母以孝聞父產

悉讓異母弟家徒四壁立不顧也英邁不羈而精研經史
初授河津訓導建五經堂課士遷萊州教授掛冠歸里
田世福字德陽貢士司訓平陸講明正學再訓宜城益厲士
行時劇賊充斥兵臨城城陷世福出與賊抗乃罵賊而死
祀名宦子七善進士別傳

衛廷憲字扶區大司馬一鳳子崇禎丁丑進士授戶部主事
權崇文門稅課值歲大侵商賈不時至乃痛革諸弊潔已
從事遠近歡然朝廷以其清特寬稅額二萬實爲曠典晉
郎中出守淮安加意振刷罔畏強禦臺胥不避道繩以法
部臺頗不懌旣廉其清介狀喜曰吾知非能爲滌衷必不
能強項益重之以勞卒於官

張履旋字坦之諸生時師表繼咸崇禎十五年舉於鄉尚書

澤州府志

卷之三十六

節行

七十六

慎言子事嫡母栗生母田曲體兩宜號稱隱孝善繼志常
構砥柱草堂以擬父所築同閣甲申寇至陽城陷勒詣平
陽履旋作書訣親訖仰天歎曰吾大人不爲亂臣吾豈爲
賊子乎奮身投崖死崖郎所謂砥柱斗削不易上深險可
四十丈事聞贈河南道御史著靜音堂集

楊鵬翼字子羽崇禎十三年進士會稽知縣有德於民甲申
棄官僑浙僮奴偶負囊醉仆爲土人所得察知曰此楊公
行李敢隱乎遂送致其所歸里曰與田夫野老爲伍桑麻
吟詠之外無他及足不及城市有司或慕而求見却不可
不得已荷衣一報謁而已著有圃亭詩集

衛吾良字完真貢士博綜典籍績學有聞侍母疾浣滌中羣
厠踰皆躬爲之四閱歲不解衣司訓太原遷通渭王府教

授經其淬勵者多佳士著義經精解

盧時升字南征郭峪里人舉天啟甲子鄉試崇禎八年下詔內外官於舉貢監中各舉堪州縣者一人時升用薦爲濟源縣知縣時流賊正出沒河以南詰戎防境賊不敢渡河歲大侵民聚爲盜者數千人勒兵殫渠魁餘解散去大獄百餘一日了之幕府交章薦調任縣縣新被兵至則扶傷吊死招流凶修戰守任以治陳相國廷敬曰當明之中葉朝廷以資格重士士亦以資格自重迨末年邊事急思得救時之材始破資格之論然終無補於敗凶者夫豈盡資格之故哉其時之政地枋國事而宰化機者伊何人而乃惟急守令其猶齊末之論已盧君非僅守令材而又憾其不究其用也

澤州府志

卷之三十六

節行

七十七

國朝楊時化字季雨前萬曆己未進士七載官行人分校拔得金聲卷又別白譚元春落卷世號知文擢戶科喜抨擊疏論高平貪吏奪職

國朝徵補舊職歷禮刑二垣又坐劾平陽判降按察照磨其古文詞蒼健郎異已者不能疵也病歸卒貧無以塋歿後復原官著有蘋閣文集

石鳳臺字翥雲天啟乙丑進士知南宮良鄉韓城三縣由刑曹出備兵寧前以主和議被逮本兵白其忠得釋陝西通志云初授韓城縣調停驛站民力獲紓歷任關輔兵憲入國朝薦署巡撫保全省城約無取子女貨帛時以事忤制府構誣改湖廣叅議移巡鳳翔未老乞歸曾挺身入亂民砦諭散其衆舊部士往來戒無犯石公里鄉人倚之著西池

集秦楚隴上詩若干卷

白孕昌字季文所學子泰昌元年恩貢廷對第一未強仕郎棄舉子業攻古文辭不屑作唐以後語樂善守貞結容安齋著書其中白首一節精於醫著蘇譚容安齋詩文集蓼解叢編及論醫各數十卷子象庚才而早亾張尙書慎言表墓深惜之象顯舉人知崇信縣減練餉署寧靜州戢悍民辭分校賠缺額歸而食貧淡飯著述與修邑志著有懷觀堂文集帝王年曆陽城詩續鈔等書

張璿字伯珩崇禎十六年進士幼聰敏年十五爲弟子員十九登壬午鄉試癸未郎成進士甫釋褐鼎革年二十耳入國朝知原武縣空城斗大初隸版圖數值兵燹至則招撫流亾緩征戢盜加意撫綏擢御史去立碑建祠己丑按四川

澤州府志

卷之三十六

節行

七十八

招攜懷遠以次開拓請撥牛種五萬散給兵民本年奏報接應軍需外餘粟六千八百有奇辛卯巡淮鹽革積弊絕私販掣引計十三萬正課溢額二十三萬臺省交薦晉大理寺丞轉順天擢工部右侍郎兼副都御史巡撫陝西秦當破傷災沴之餘又值軍興煩費條理緩急悉合機宜秦人戴之如天地父母會督臣移駐川中一切籌運卹降當機立決請割平慶臨鞏延五郡分隸甘延寧三巡撫以便民䟽鄭白二渠水利甄別左遷福建督糧道去之日百姓頂香揮淚祖帳壺漿數百里不絕抵閩通商革羨蓄儲饒裕二載以勤事卒於官年四十有二嘗言人於五倫遭逆忍苦不求人知郎此是陰德白尙書稱爲清介魏司寇目爲狂狷康熙六年追崇名宦著按蜀稿巡淮撫秦奏䟽

王曰俞字熙仲前崇禎癸未進士入

國朝知孟縣遇事咄嗟立辦泣任方踰月會闖孽數萬集城下攻擊七晝夜曰俞仗劍登陴督士民守禦賊將引去已而大雨如注城壞因乘隙以入曰俞復率家人巷戰爲賊所執迫之降罵不絕口遂遇害事聞

賜諭祭曰同讐者義士之壯懷殉城者貞臣之亮節爾知縣王曰俞任當守土偶值賊氛乃能抗志靡他以死明義朕甚嘉之憫之爰賜祭一壇旌爾風烈九原不泯尙克欽承段上采字五雲丙戌進士知沐陽縣性仁慈有循吏風以治行高等薦會齊寇竊發猝夜至潰城入執上采座上上采低頭緩步已而忽奮起擊賊帥幾中賊大怒遂剖其腹以死妻劉子公樞暨二僕胥不屈被殺事聞

澤州府志

卷之三十六

節行

七十九

賜祭葬贈奉政大夫江南按察僉事蔭子入監

王用傑歲貢生順治三年知澄城縣時寇攘未靖請兵親勦執賊魁康姬衛戮之餘就撫四境帖然乃復修廟學葺衙署澄邑始復舊焉

張爾素字賁白登雲孫丙戌進士官編修己丑同考所得皆名流壬辰擢左春坊左諭德時議出中朝臣練習民事爾素得江南叅政廉潔自矢力禁奢靡士民碑頌之擢陝西按察立剖滯獄晉湖廣布政建書院羅致楚才談經課藝丙申復入爲通政至刑部右侍郎外艱給營葬白金四百兩尋轉本部左三人秋省會求直言引禮經大法小廉之義疏論天下巡撫辛亥引年歸以原官致仕年六十三無疾卒

勅賜祭葬

喬映伍字白山選庶常歷官左贊善事繼母及世母至孝以繼母春秋高苦節四十年疏乞終養捧宮衣歡然入里門朝夕侍膳視聽在形聲之外分田舍給本支敦厲名節於故讀書山寺建精舍爲邑士藏修之所所著有白岩山房集

王克生字孟禎進士好博綜初知沛縣賊團聚親詣其壘散之以軍供失帥意謫判許州遷知壽光請豁斥鹵竈稅無何卒於任每之官購書自隨行坐必挾冊哦誦人號書淫著懷古集

衛貞字伯始進士知商城境接吳楚爲盜藪諭勸投戈由工部員外郎爲御史按江南首劾不法方面又陳八弊四害

澤州府志

卷之三十六

節行

八十

會海警論失守官從輕因逮問旣而得釋家居鄉有利病力白有司以狀未嘗瑟縮也著閒閒草按吳疏採風吟等集

王崇銘字心盤前舉人入

國朝知永年縣擢計曹權潁墅關歷郎中知處州府以撫寇進福建運使大兵入閩需舟楫檄督造不數月成數百艘竟以盡瘁卒於官

白孕謙字子益崇禎十六年進士改庶常以臺臣薦授內秘書院檢討修明史恩廕予姪方熙入

國朝歷學士廟堂著作多屬草晉刑部尚書作刑法論默回懲奸重典論按臣王秉衡案方嚴詰主筆者孕謙侃侃立任終諒無他不深罪也謫太常少卿正雅樂辨合祀遷通

政使疏諫告訐者必定誣抵罪不令奸惡得肆仇妄鉅箚之風始息老病乞歸遂不出名其齋曰歸庸潛心性命著學言二卷容城孫竒逢以蔡神與鄒東廓擬之著東谷集桑榆集輦下新聞林下晚聞家譜祭約等書子方鴻舉人官故城令卒士民泣遺愛焉著少如集方厚力學有父風早歿著尋樂集崇志堂稿有子畿康熙辛酉成進士田六善字兼三少孤力學丙戌成進士知太康縣以治行入爲戶部主事權臨清關監鳳倉權臨淮關悉罷濫征革竒羨歷郎中擢御史疏請勸清吏以養百姓勸督撫以養清吏掌江南道巡視長蘆鹺政假歸起補陝西廣東道御史疏稱吏部條例日繁日吏部用人行政有偶出意見實係過誤者奉

旨皆循爲例是意見可以再行過誤可以再舉也例旣無所不可弊故無所不爲意欲如此郎有此例意欲如彼郎有彼例請應定條陳准行外餘不得槩引爲例巡視京通二倉歸管刑科給事中疏上

聖學宜先讀史日講諸臣通鑑與經書並進仍令不許忌諱其言尤偉尋補光祿遷通政司叅議擢僉都御史時滇閩倡亂條上勦討大計策吳三桂五敗謂遺親背主親刑故舊假號誰欺自古足無扼吭之理且兵單首尾難應脅從猜忌于中猘獠窺視于後倔强其能久乎通達國體密佐平滇累遷順天府尹會發帑買米京城騰貴抗章請罷之尋擢工部左侍郎調戶部督理錢法閱視河工旋轉左侍郎以老請致仕歸後十年卒嘗贊魏敏果臺綱舉于清端

撫保定當世稱知人著有鷓棲幔坡集拾瑤錄與修邑志
子泂舉人榜發而卒沆進士中書兄弟有文名

楊榮序字半嶠進士有詩才初仕慶陽推官順治十七年遷
知桂林府多惠政艱去復知平樂府人不敢干以私狂猾
多羅織猺獍肆吞噬或至鋌而走險榮序廉得實蔓詞槩
不理獄幾空庚戌疫出貲注藥活者數萬三權關稅正額

外不妄取修廟學葺府署繕城垣號粵西循吏

本名榮蔭
改榮序

田七善字澤行世福子進士知合江縣奉查楠木繪圖以狀
採取之難獲免解內艱起補狄道創休番法民不苦轉運
西逆之變間關賊中不少汙大將軍上其狀授戶曹擢稽勲
主事驗封員外足疾引歸卒

賈益謙字六苻明天啟四年舉人任雞澤令遷兵馬指揮亂

澤州府志

卷之三十六

節行

八十二

後歸人

國朝爲太僕寺丞有廉直聲晉戶部郎中督餉延綏革侵冒
之弊差竣晉階四品廕一子再領徐州卒于官

趙士俊字堯宅順治三年進士任山東茌平令時巨寇負固
鎮兵不能制乃懸賞格購之未幾與直指忤被議歸里年
七十二卒

衛立鼎字慎之號蘓山道濟里三甲人康熙癸卯舉人吾良
孫初爲盧龍縣令行取除農曹郎中遷福州知府年老以
原官致仕當其爲盧龍時兩京孔道驛騷旁午諸供帳錙
黍不累民徵米勺抄以下無噐可指吏爲奸升合取乃令
各戶合納統歸之斛斗于清端撫畿輔舉廉吏以立鼎爲
第一靈壽陸令隴其次之格文清巡撫時曾來縣謂曰令

之苦無異秀才時然爲秀才時自苦耳今令苦而百姓樂不猶愈乎魏大司寇象樞巡察畿內至盧龍治具不爲食啜茶一甌曰令飲盧龍水吾亦飲令一杯水諸大獄悉咨詢鼎曰民無知宜哀矜勿喜魏公稱善者再年七十六卒立鼎幼育于祖經書皆口授所著有約齋詩文集輦下吟漫堂和詩如干卷

張泰交字公孚席谷里人地近沁水傍沁水一曰泊水故又字泊谷生而秀碩有異質父諸生游覃懷迄不知所在誦孝經每嗚咽不自勝甫冠大父歿家益貧落欲棄書册爲賈人會祥符張甫令茲邑於童子試中竒之因授以春秋遂精於春秋制舉業康熙辛酉舉於鄉壬戌成進士任滇南大理府太和縣令縣附郭民苦供億多流亾兵驕橫占

民居者十九且以縣廷爲營房令至者莫敢問前令僦民舍以居至則吏請就民居泰交曰縣令命官也宜有體何用民屋爲竟馳入縣廷方視事庭中營兵來較射泰交謂縣令臨民地非兵校射所語不遜鞭撻之於是諸營稍讐伏大理八州縣而太和獨困於役泰交請歸各州縣兵糧縣收縣放力除徭役雖大吏亦募夫上官悉聽其議營兵混民居男女襍沓乃規地構屋俾無得與民錯處諸廢具舉邑大治越五年擢廣西道御史疏通選法請餼山東饑民獲全活者二十八萬有奇巡視北城見旗人塗毆職官問之則舊嘗稱貸業償數倍者也鞭其背索券毀之宿猾李三號賽黃彪者以怨殺人而誣山東張乙獄成矣鞠得實論如法事涉勢要弗顧也掌山東道時考選科道奉各

舉所知之命班行謂科道亦宜舉泰交曰若科道出科道門豈復能糾劾吾輩耶都憲張文端是之語聞遂命巡視長蘆鹽政己卯補太僕寺少卿提督江南學政歷大理寺卿副都御史至刑部右侍郎皆在學政任癸未巡撫浙江大閱羅木營毀玉環東洛南麂諸山棚以絕賊艘樵汲修江塘易土以石方蒞任時恭遇南幸賜額推誠遇人尋以疾請

特遣中書嚙爾泰來視章未下而歿上聞而悼惜卹予逾常等初母范歿毀幾殆哭而目眚皆裂少痛父不歸每思慕悲號以故爲巡撫時嘗不良於視至上前屢懼顛越每垂問焉其始生時震雷繞舍有龍起壁中明日鄰媪云夢天樂聲送兒來知有自也爲明太宰愼言

澤州府志

卷之三十六

節行

八十四

從孫

張多學字覺初郭峪里人方重亮直不苟訾笑巍然儒行碩德爲學者師於親孝於兄弟友恭於友信兄多聞爲父所愛遭竒疾狼藉枕席間他人至不可嚮邇乃躬爲扶持卧起湯藥嘗而後進後歿父以愛子故忽忽而病多學視氣聽聲隨事順體自潔食飲飲食之卒賴以安與人接温温侃侃勉其善而遏其非被容接聆罄欬者薰蕕水炭氣沮意消老屋三間藉書枕冊浸漬丹墨元日除夜猶聞絃誦聲學者摳衣執經多所成就子于廷順治己亥進士孫之麟康熙庚午舉人以子令永從封文林郎

田雨時化源里人先世元時自高平赤土坡徙陽城父三驅以孝聞雨時爲弟子員時卽潛心性命之學尤邃於易嘗

舉全史中治亂興衰之迹與易之否泰剝復相乘除者爲証亦皇極經世書遺意性豪邁多大節嘗脫人於死其人亦不知流賊瞰陽城勢張甚邑人欲迎以避禍正色斥之賊至攜幼子及兄之遺孤以行度不能兩存棄幼子獨負其遺孤倉皇山谷間其幼子幾不免後得之俱生還貌魁梧聲若洪鐘廣座中持正論不少假借讀書外不問生產屢空宴如子徽典諸生郎前攜避難者次從典大學士贈如其官

田從典字克五號嶢山化源里人少游學濟源聞父雨時疾未明走太行山徑虎前後翳林嘯谷行不輟黎明行旅驚見曰此何地乃敢夜行兒時拾學宮鋸斷餘材父藉爲枕父卒銘而藏之見輒流涕甲子中鄉試第二戊辰成進士

知廣東英德縣革陋規置學田悉實心行之行取授雲南道御史疏陳調曰州縣求調之弊有三希美缺避衝要豫爲卓異地也濫調之弊亦有三徇請託行賄賂用腹心宜嚴定督撫違例處分則吏治自清在臺凡六年兩巡西城抑強除濫吏懼束手掌登聞院查通倉掌山西道補通政司右叅議擢光祿卿遷都察院副都御史兵部右侍郎仍帶光祿寺凡任八年鉤稽精詳奸弊不得行且節浮費累萬任兵部選法嚴核意所不可不爲面從著砭愚說以見志武臣占籍久者奏與入籍陟都察院掌院事陞戶部尙書銖分無敢匿辰解已兌都無淹滯雍正元年總理事例

上嘉其清正偕大學士恭點

聖祖仁皇帝神主故事行禮胥用閣臣蓋特典也

賜清謹公方四大字轉吏部尚書尋

命入閣授

文華殿大學士兼吏部尚書爲首輔清望雅孚百僚儀楷四
年五月以微疾乞休六年三月疾大作復辭位

天語褒嘉著加太子太師銜以原官致仕帑金五千兩爲還
家路費四月十六日公鄉祖餞都門翼日疾甚二十日薨
於良鄉驛年七十有八

特遣大臣辦理喪事仍令官員送至原籍謚文端族子御史
嘉穀嘗問

聖主倚注而同列胥敬信奚道致之曰樸誠而已又問屬吏
曰任之而盡其才有小過則寬之子懋官吏部驗封司郎
中從典工制舉業著嶢山集四卷旣歿

澤州府志

卷之三十六

節行

八十六

命入祀賢良祠

張茂生潤城里人由父瑋廕歷任戶部主事轉員外郎中監
督右翼興平倉以勤慎著母老終養回籍里居二十七載
砥德勵行建周程張朱五賢祠以崇正學設經蒙兩學延
師以培後進修橋路立社倉置義田歲荒設粥全活多人
爲鄉黨區畫之事甚周所著有息齋詩文集所刻有朱子
薛子要錄洎水齋蘋閣文鈔魏敏果庸言陽城詩鈔等書
卒年七十有二里人哀悼爲之罷市

白畿字彥京大司寇孕謙孫五歲而孤母王氏苦節撫之性
篤孝文辭藻贍以息廕中康熙戊辰進士授新貴縣令因
黔陽路遠不克迎養抵任三月卽請告歸里依依滕下者
三十載母終年八十有三畿衰齡哀毀禫制方闕卒死孝

時年六十有七著邇園詩稿二十卷

田彤邑增廣生侍御嘉穀父先世仕元家渭南明初因隱跡來陽城山中彤幼卽恂謹孝友踰壯始補弟子員爲文不徇時好擺脫一切獨邃深古學手鈔線囊凡數十卷每開卷必敬恭如晤對古人教生徒不問其修脯轉給其食飲前後出門下多至數十百人無不愛且敬從子七人悉從學得教訓力人告急郎應不計已之有無亦不責償書篋中多廢券焉子嘉穀壬辰成進士官翰林轉階御史績學清修家居簡樸於諸生時無加損也益知彤之教矣以子貴晉封翰林院編修孫圻雍正癸卯舉於鄉

陵川縣

北周郭誕任并州刺史以禮訓俗威惠並行豪猾咸惕息窮民無告加意撫綏士大夫仰其政節

宋張廷翰初爲漢祖親校周世宗時從平淮甸功遷鐵騎都虞侯入宋領開州刺史未幾轉龍捷都指揮乾德中從劉廷讓征蜀次夔州白帝城與武守謙戰于豬頭鋪敗之乘勝拔其城蜀平領彰國軍節度開寶二年疾太祖親臨問卒年五十三贈侍中

都貺哲宗時舉進士官鴻臚少卿每朝帝虛已咨問貺引經正對多見嘉納拜梓州轉運使提押西川四十五州大著美績還居錦屏山中集諸名士爲芍藥會詠歌自得薦薦不起兄嚮有名方技姪嘉猷皆舉進士

澤州府志

卷之三十六

節行

八十八

都嘉猷以明經舉進士初授信德知縣有惠政民愛之如父母

兵馬總管鈐制有方多偉績進天水開國子食邑五百戶賜紫金魚袋

趙文昌官京兆轉運副使有能詩名字當時

金郝震字子陽父祚自潞遷陵川經之曾叔大父也讀書不爲諛聞之學有高世意而無復世味以經旨授學者析之以天理人情而不專於傳注彈琴得古遺音一日於道院松竹下鼓琴而歌鶴十餘驚起鳴舞珊珊憂曲終乃去兄弟七諸兄以族大稱長兄之命異居震涕泣三日不食曰諸兄得欲而生我將服義而死諸兄懼復聚廬同食以終年四十九初名旦自號東軒老人

郝源字清卿父昺昺震之長兄郝氏世業儒以治經力行爲

本曷以嫡長蒞家有法制使子孫世守源以次秉家督時
昆季十餘族長穉百餘口既摠家事乃會戚屬而告之曰
衣食足而知廉恥倉廩實而知禮節士所以忘義失守至
於沮氣墮節殆多逼於饑寒故孟子以農桑爲王政之本
今某以次爲家督欲諸宗親子弟治生爲學二者兼進始
則仰事俯育終焉立身行道進而得則各大爾家退而失
則必有所歸不至於落魄無賴亦足以爲善士夫少有大
志不事家人生產雖或成就有過人者而爲書傳所稱亦
非教育之良法芟駕破車雖一日千里曷若馴服以進於
道乃量子弟之材噐曰畀汝田汝率農人治之畀汝桑汝
率諸婦蠶之畀汝錢汝率商人治之畀汝書汝從某師友
治之余則均其有無而察其勤惰其在家鷄鳴而冠衣杖
而立於庭諸房子弟婦皆闢門秉燭盥漱笄總黎明以次
省於舅姑父兄退而各執所業或少有稽緩則旦而問之
故責之庭少廢禮者則加鞭扶至於再會宗表列其狀而
加之罰飲酒醉者有罰衣冠不正者有罰事師不謹者有
罰惰于學者有罰相碁間者有罰譁於庭者有罰中堂曰
棣華歲時燕集上下肅然

郝天挺字晉卿曷子其高曾以下皆學而不仕天挺始赴廷
試以太學生頡翥搢紳間崇慶之變束載去之時金已棄
燕雲河朔亦不守貞祐初人爭南渡阨于河上下千餘里
流民數百萬死者十七八天挺乃貽書譏察使范元直曰
昔昭烈當陽之役既窘甚猶徐其行以俟荆襄遺民曰成
大事者必資於衆人歸而棄之不祥君子謂漢統四百年

此一言可以續今河朔民獨非赤子乎乞詔河津聚公私船晝夜放渡以救遺民書奏卽日放渡河朔之民全活甚多共教學以治經行已爲本史稱天挺早衰多疾厭於科舉遂不復充賦太原元好問嘗從學進士業天挺曰今人賦學速售爲功六經百家分磔緝綴或篇章句讀不之知幸而得之不免爲庸人又曰讀書不爲藝文選官不爲利養惟通人能之又曰今之仕多以貪敗皆苦饑寒不能自持耳丈夫不耐饑寒一事不可爲子以吾言求之科舉在其中矣或曰以此學進士無乃戾乎天挺曰吾正欲渠其不爲舉子爾貞祐中居河南往來淇衛間爲人有崖岸耿耿自信寧落魄困窮終不一至富豪之門興定元年年五十七歿于舞陽客舍天挺美風儀冠裳甚偉嫻於辭令脩

然物外人

郝天祐字賢卿東軒老人子初爲學卽不作決科文太安未知有復隍之變益遯默貞祐初南渡隱居魯山作爲詩歌徃徃散落人間玩意書法云當以篆隸意爲本大字雖大而小小字雖小而大正書須有草意草書須有正筆其論書如此趙內翰欲致之京師卽避去山林幽阻人迹不及者而居人復知其處又欲薦於朝又避去元裕之聞其又遯乃以詩相招復以詩絕之壬辰没于兵年四十九一子思直博學能文亦没于兵

郝思温字和之天挺子資剛潔與世不偶中心充實無所虧欠年二十隨父下太行往來淇衛貞祐南渡族行父邁疾謂之曰郝氏儒業自吾叔父東軒老人始我葬墓側庶得

奉杖履于地下既祥將歸葬父兄以河朔兵亂不許乃夜啟殯負其骸以遯而英靈屢見於其所徃翼之行渡河至長垣資用爲盜斂從行者散去獨與妻許徒步負骸登太行盜掩至將兵之許獨不動盜曰若何人獨此不去所守者何寶許曰此我翁之靈將歸葬者有死而已其可去乎亮少沮詢之曰我陵川許氏也昔兄曾脫盜盜驚遺白金數兩去時隆冬雪盛天地晦冥思溫適病目冒行風雪中不復辨蹊徑望峰巒爲的顛頓踣仆匍匐崖谷間許時道思溫而進才半塗已入夜黎明始出山再日達陵川克葬元光復渡河三年卒卒之頃整衣冠彊起咄喏曰發志氣遂瞑教人必以小學爲根基曰人之始生其醇未醜先入者爲主終身由之而不能去彼所見者以爲小吾所見者

以爲大歐陽子謂顏狀未離于嬰孩高談已及於性命未可也語子經曰士不能忍窮一事不能立染指垂涎之氣不除負鼎滔天之心常在能堅忍決若長河而不回屹若泰山而不移然後爲大丈夫其所得如是

元郝經字伯常世爲陵川人天挺孫自八世祖以下皆同居業儒匱德不仕教授鄉里爲一郡望族父思溫生三子經長子次庸次彛幼父母挈避亂河南衆數百皆匿窟室敵索知薰穴而死者殆盡母許因咽塞而絕經甫九歲匍伏得黃蘗一瓶又得蜜一器用母所佩剪刀抉齒以蜜和蘗汁飲之頃而蘗既長父欲理家事紆目前急母曰是兒志氣不凡況郝氏儒家淵源不竭可自我而涸乎我等忍窮數年俟之經感奮力學一日鷄初鳴經猶伏几案書帙紛

綸殘燈無焰母見之慨歎曰兒若是望不虛矣然毋進銳
退速也於是朝執薪水之役晝營幹家計暇卽讀書不輟
張仲安識之聚童子俾教學刻苦肆意者五年遇疑難期
必得常自誦曰不學無用學不讀非聖書父命名經蓋以
專經望之故慨然以興復斯文道濟天下爲己任元帥賈
辟公授經有書萬卷蔡國張萬戶館之亦有書萬卷得恣
博覽元遺山見之曰吾子狀類先生才識間出有所積而
然也江漢趙先生曰江左學如伯常者多視伯常挺然一
氣立于天地之間蓋亦鮮矣元世祖在藩邸召之不起復
召至見於沙陀告以二帝三王之道上立國規模二十條
有一國規模天下規模萬世規模會大舉伐宋經乃具奏
以爲古之一天下者必已之德澤深厚紀綱完具彼之荒

淫亂虐敗亾有釁天命人歸一舉而取之今地醜德齊驕
肆妄動輕則見沮而還重則覆亾之不暇我國家開創以
來彎弓躍馬窮征遠討四十餘年紀綱未立民不聊生彼
之君臣輯睦政事修明無釁可乘我乃空國而來僥倖一
舉諸候窺伺于內小民彫弊于下人之攻我者不啻數十
百道而不備乃利人久備之道而攻之臣見其危矣退而
著書義名之曰七道凡七千餘言頃命副楊惟忠爲江淮
宣撫使楊以私故欲還汴梁經爭不可楊怒經竟建旆而
南楊懼卽與俱會大師于江上後全師綴于一寨死傷甚
重急奏按兵明年卽位開平召使宋或勸稱疾經曰吾學
道三十年無益于世今天下困弊已極幸而天誘其衷有
意息兵解兩國之鬪活億萬生靈吾學爲有用矣遂赴召

以爲翰林學士佩虎符充國信大使告登位布通好弭兵
息民意請與二三蒙古偕行不許曰只汝等往彼彼君臣
皆書生也且賈似道在鄂時已請和於我矣行省李璫實
不喜和先達知宋乃止經經以璫言聞而行旣邊師仍侵
畧宋境經責以不遵約束至徽州館于軍營謂李松壽一
再犯邊故且留儀徵又出李廷芝書云信使以美意而來
松壽乃懷奸以逞殆類欵兵誤國械李璫敗將爲左驗時
平章王以道忌經本欲擠之外出宋亦不遣牒三省又致
書似道上宋主闕下辨戰和利害前後凡數十萬言抑之
不報經曰吾惟有忍死以待守節不屈耳宋亦不加害反
敬之厚其廩餼著書吟詠自若至元十一年問以執行人
之故始禮而歸凡十六年明年疾革書天風海濤四字而

卒年五十有三初圍鄂以國喪而解似道冒却敵功拜相
後秉政諱其事以故久留經使不得見經歸而似道誅又
明年宋亾其在徵時有繫雁帛書事歸後始獲雁於他所
曰金明池神之也所著有續後漢書奪魏而與漢黜奸雄
之僭僞續一代之正統又以春秋聖人用道之書作章句
音義及制作本意比類目共若干卷使讀者得聖人之旨
趣又作三傳折衷凡四書總名之春秋外傳合十餘萬言
以易諸家傳注議論不一著周易外傳十卷又爲太極演
原古錄通鑑書法玉衡眞觀刪注三子一王雅行人志各
數十卷合十餘萬言經拘留宋中不與世接反得究竟著
述子一采麟集賢學士朝請大夫

李平字世昌廷實祖制行修潔元初避亂河南挺身投牙山

李帥爲軍事經略干戈擾攘中救援而得活者數千人未幾還里仍爲儒人以賦論中復其家常訓子孫云修身莫如學問治生莫如業農以孫廷實積官贈隴西郡侯長子義卽廷實父次和又次欽

明張瓚字宗器天順庚辰進士堅苦力學與同時薛敬軒王一夔砥行由部曹出知臨洮府剛正不苛滿任去民留其履官至太僕卿子信舉人判岳州有廉能名卒於官

王道弘治戊午舉人知陝西朝邑縣正德戊寅大陽諸里民田千頃淪於河無已請折糧以布又縣當要衝不置驛民疲于奔命且與蒲華等偏枯爲累特甚請得郃陽澄城協助民始蘇遷判河南著六泉集

武思明弘治壬戌進士知金壇縣性質樸食淡衣羸儼然寒
澤州府志
卷之三十六
節行
九十四
峻愛民好士汲汲如不及蒞政未及期奸吏悉遁跡稱神君焉居鄉卓有志行推誠立教門多聞人

馮時亨嘉靖甲午舉人判濟南清馬政修漕河擢知陝西金州時巨寇何勉嘯聚命將帥捕治時亨給餉不匱多所贊畫奸宄悉成擒清廉自矢一時有廉幹稱

李萃秀字東園萬曆壬子舉人邑志稱其有天才熟於史結澹寧大社淬勵子姓一時學者多就講論著醉哭軒集

路如瀛崇禎中爲臨清州同知十五年閏十一月殉城

李鳳字公儀唐順宗十五子福王綰之後其高祖順晉陵路同知封陵川男曾祖思温進士靈州知州祖約以長子貴贈御史父用賓鄉舉懷慶府推官鳳在永樂中任順天通判生平質直不爲崖岸與人交必誠必信居家以詩書爲

菑畬焉見邑人張瓚碑記

國朝曹邦偉字文雄以恩貢授定南知縣噢咻疾苦弘獎風流士民咸愛戴之會金聲桓發難捍守孤城力竭城陷不屈以死長子翰明次子際盛姪翊明僕曹伏新等十一人俱從死一門橫屍邦偉之所感深矣事開

詔贈江西按察司僉事予祭葬廕一子入監

秦克俊字毓德貢生知南豐縣死金聲桓之難而卹典未及人咸惜之

沁水縣

北齊徐遠字彥遐少習吏事郡辟功曹未幾除癭陶令神武以遠閑習書計命爲丞相騎兵參軍常從征伐克濟軍務深爲神武所知歷鉅鹿陳留二郡太守天保初爲御史所劾沉廢尋以舊勲入爲太中大夫天統四年加開府遠爲治慕寬和有恩惠至東楚時邑大火躬自赴救對之流涕仍爲經營皆得安立子世榮黃門侍郎武平初卒

金張埜天眷中經義進士歷榆次陽城繁峙解縣四縣令操履練達留心撫字惠孚於民卓有政績終朝請大夫車騎都尉

明潘中洪武初薦辟知平度州居職公正百姓悅服艱歸有以騾馳送者抵里仍與之值其廉平如此

澤州府志

卷之三十六

節行

九十六

常軌成化辛丑進士授大理評事陟右寺副僉事讞獄多平反遷河南僉事行部至密縣有平民拷掠不勝被誣爲盜者察其冤破械出之至西平及裕州有豪猾恣爲奸利者鄉曲苦之前官不敢問軌各正其辜一路肅然民咸頌之尋卒於官貧不得歸葬厝汴者四年姪賜成進士始還其喪

王寶監生成化中司諭咸陽以禮教率諸生多歸矩範師儒不苟官職者

李瀚字叔淵其先翼城人徙沁水成化庚子解元辛丑進士知樂亭縣民皆荒竄比瀚至招集流亾復者大半豪猾所占田悉查反之民樂業擢御史按陝革茶馬弊貴璫不敢暴橫終南妖僧倡逆密遣使計擒之不與聞鎮守閩人知

而首惡已致麾下矣還臺命察審邊將吳昭失律竟斬之副使陳州有項城典史爲衛指揮子世恩所殺立按法遷右副都御史督漕時榮王之國道由運河貴璫冀得賄輒阻遏糧運適瀚會議北上正色啟王飭從漕分行弗尼運已轉左往勘中官劉瑯攘取私販奪其官逆瑾誅時忤瑾者悉與起用擢南戶部尚書論析公庾府帑戶口田賦盈縮之數歷歷如指諸掌又疏請裁冗食節浮費廣儲蓄并諸軍布徑輸折色由部不由璫永杜奸利時廩藏空虛瀚乘秋熟發帑金代兵餉積米數十萬斛年未及屢疏乞身歸石樓山讀書秉禮以老風裁峻整遇事敢任而用心平恕人稱其德量無異辭也卒贈太子太保子承恩正德庚午舉人良鄉知縣曾孫一鵬通判保定府

澤州府志

卷之三十六

節行

九十七

常賜弘治己酉解元癸丑進士知行唐縣擢御史左遷天長縣移知鄧州終陝西副使賜幼孤育於從父軌撫卹教誨卒致通顯返軌首邱子倫正德進士

常倫字明卿賜子正德辛未進士生有異稟長詩賦書畫其樂府尤工與何李相上下嗜酒喜談老子谷神不死以爲神仙可學因自號樓居子放曠不羈見人輒作青白眼傲睨一世初任廷評謫判壽州會盜警募死士禦却之尋棄官歸起知寧羗州不赴日沉醉爲文立就一日忽緋衣馳馬云當赴補已而墮水死年未壯人多惜其才著有常評事集張忠烈銓作傳記之倫多力善騎射時馳馬出郊與侯家子弟俠少年較射問知爲常評事奉大白爲壽輒引滿揮鞭馳去又時過倡家宿至日高春徐起赴朝參長史

訶之敖然曰故賤時過從胡姬飲不欲居簿耳中考功法調判度置御史罷歸益縱聲伎自放酒間度新聲悲壯艷麗時從外舅滕洗馬飲大醉溺漳水中年三十四平陽守王溱爲收葬之並刊常評事集四卷行于世

李春芳字元實嘉靖癸丑進士知盩厔縣會歲祲勸輸賑濟每營度必爲經久計姿性明爽而遇事敏幹詔入擢兵科給事中

韓君恩字元寵嘉靖丙辰進士孝弟純明事伯如父資舅氏殯從母不遺餘力寧自甘不給丙夜自炊不辭也初授廬州推官以廉平擢御史按甘肅時徧歷都亭禦敵咸有方畧還命察京營直陳虛伍其弊悉由權璫雖招忌不顧己而備兵溫處病歸不究其用卒

澤州府志

卷之三十六

節行

九十八

衛天民字志伊嘉靖乙卯舉人有文名初判河間獲假錦衣衛葉禮父子治之不少貸以艱歸起補眞定擢知濱州有善政勤事卒於官少事父因父鰥居侍養不離左右推田宅予諸弟子思濂副榜未弱冠迎其父喪歸里次子思洛敦內行崇禎六年流賊屠城被縛不屈死妻尙媳李抱子並投火死

劉東星字子明隆慶戊辰進士改庶常授兵科給事中轉禮左會新鄭復出將疏其失或有泄之者藉口汰言路謫蒲州丞徙盧氏縣入爲刑曹力辨冤獄尙書執不可竟致極刑比事後得實鐫及尙書以下官而東星譽望著矣由監司提學兩浙歷藩臬擢撫保定區畫征倭師集津門時被災請平糶漕米十萬石乃濟召爲副都御史晉吏部侍郎

父老請侍養歸外艱起工部二十六年河決單之黃堍命兼僉都總理河漕初尙書潘季馴議開河上流循商虞歷丁家口出徐州小浮橋復元賈魯所浚故道以費鉅萬未果東星卽其地開濬起曲里鋪至三仙臺抵小浮橋又濬漕渠自徐邳至宿五閱月工竣費僅十萬進工部尙書明年渠邵伯界首二湖又明年奏開泇河泇河南通淮海引漕甚便前總督翁大立尙書朱衡屢言尙無成畫河臣舒應龍鑿韓莊工亦中輟東星力任之議費百二十萬工起渠成十之三費止七萬得疾求去屢旨慰留工未竟而卒後李化龍循舊跡與李三才共成之漕永便焉東星性儉約歷官三十年敝衣蔬食如一日天啟初贈太子少保諡莊靖

韓范字思兼萬曆丙戌進士授工曹理南旺闢立八禁調十二事漕商兩便之遷營繕司員外值定陵培土暨長公主建府等工並起力清權璫破冒宿弊節帑十餘萬緡冢宰孫丕揚擬調吏部或沮之大司農張養蒙不平范曰士何官不可但恐人負官耳可擇官乎轉武選郎中適軍政范嚴毅廉靖黜中璫所私千戶鮑拱權貴銜之借霍文炳事降金縣典史卽日騎驢出都甲辰丁外艱貧不能襄事當道助之始勉成禮投閒二十七年帶經而鋤舊所有負郭田數畝從子貧時給之訓曰吾予汝一錢難于他人千百也泰昌初起武選郎中天啟元年陞南通政明年遷順天府丞進右通政值魏忠賢矯旨杖郎中萬璟范上執政書引王文端封還詔書事以諷之海內翕然瞻仰責蒲州久

不調或言之掌銓辭以不識面乃第作五官四體問答寓意卒不肯一謁要津後時政日非自以不合時宜遂引年去國超然逆焰之外其難進易退之大節孫尚書居相誌極言之居恒五倫盡分爲德于鄉鄉人感焉歸構佚我園讀書其中病中撰祠堂碑文本支世系圖考及訓蒙格言授子著經世集要司馬紀實黃萼吟等書卒年六十九

孫居相字拱陽一字伯輔萬曆二十年進士知恩縣授南御史負氣敢言直節大著羣小目爲東林黨人嘗疏陳時政謂政事日廢治道日乖天變人怨究且土崩瓦解縱珠玉金寶巨地彌天何救危亂不省誠意伯劉世延罪廢居南京益不法疏發其奸并及南京勲臣子弟暴橫狀雲南稅使楊雲激變太和山中官黃勲噉道士毆知府皆極論實

澤州府志

卷之三十六

節行

一百

法時中外多缺官居相兼七差署諸道印事皆辦治劾大學士沈一貫奸貪植黨一貫遂去居相亦奪俸一年內外艱起劾吏部尚書趙煥力爭吏部侍郎方從哲由中旨起官中書張光房等五人以鯁議擯不與科道選竝抗章論列時言路多附吏部居相力與抗氣不少沮於是過庭訓劉光復等十一人羣起爲難居相連疏檣柱迄不能害出巡漕言徐光祿折漕罷運之非按順天擊中璫諸不法列臺班十二年排衆昌言下抨羣小上指乘輿與黨論相終始志獨矯然不屈以年例出爲江西叅政不就天啟元年起光祿少卿改太僕擢都御史巡撫陝西四年春召拜兵部侍郎冬引疾歸給事陳序遂劾居相出趙南星之門黨比楊漣又劾居相曾力薦李三才遙結史記事遂削奪崇

禎元年起戶部改吏部以戶部尚書督倉場時給事楊時化劾高平知縣喬淳貪虐坐贓二萬淳有奧援而居相有報時化書言極憤激喬淳反噬坐家書有國是日非之語因遣戍潞州竟歿戍所其不共忤璫諸賢駢死詔獄亦幸矣著有北臺奏議維風約藝林伐山等集

張五典字和衷萬曆壬辰進士由行人遷戶部主事監天津倉歷郎中值京察執政假中旨留其私人五典極論其非出爲濟南叅議遷河南副使時大盜張西岡妖人潘大賢聚衆爲亂授諸將方略俱撲滅已而礦賊起不可制五典偵得其狀隨出三牌一禁入山鬻賊食者一令亟爲飲食以待賊一令民各歸鄉井賊無所得食出見壺漿陳路隅大驚詰其故曰此張公指也因出牌示之皆感泣去遷山

澤州府志

卷之三十六

節行

百一

東叅政海右荒盜且起遼米因海禁不得時至會攝登萊開海禁遼船至者相屬民得食不用勦而盜平入爲太僕寺卿遷南大理卿乞終養加兵部尚書卒贈太子太保五典性嚴重居朝廷中立無所倚附新建張位欲令出門下卒不往雖平進九列究亦不獲大用諸子多以科目顯長忠烈銓最賢殉難銓有才名季子鈗獨不仕力行仁義有長者稱

孫鼎相字玉陽萬曆戊戌進士授松江推官擢戶曹力拒大璫私請乾沒諸弊省工費數萬歷銓曹不徇情備兵肅州屯田裕餉入爲卿寺暨三撫楚卓乎羣材之上執政魏廣微父事逆闖忠賢狼籍縉紳鼎相語人曰魏見泉可謂無子見泉廣微父允貞也廣微聞之切骨嗾御史張訥叅論

回籍方在朝時久與吉水應山游見忌羣小東林蒙禍凡天鑒同志諸錄流布鼎相其睂目也幾不免虎口矣比懷宗誅璫起戶部侍郎引年不拜鼎相與兄居相同爲籍魁環睨欲得而甘心乃卒以老壽終牖下亦難之矣著承恩堂遺稿數卷按江陰陳君鼎東林傳謂前明死難死事忠臣義士得四千六百餘人節烈婦女在外有傳六十卷爲偷兒胙去僅存姓名錄慨自東林講學以來賢良疊出柰崔魏煽禍逆案揚灰熏思兩朝斬艾殆無虛日仁賢亾而國與之隨盡矣後生者聞齒及畏之若洪水猛獸局勢之變乃至於此傳本七錄曰天鑒曰雷平曰同志曰薙稗曰點將曰蠅蚋曰蝗蝻逆璫魏忠賢於天啟五年十二月乙亥朔矯旨凡削籍追奪逮問追贓號東林黨人榜頌示

天下共三百十九人鳴虜國無人矣雷平錄謂出沈滄蠅蚋錄出溫體仁薙稗錄出陳演楊維垣點將錄出魏廣微蝗蝻錄出阮大鍼旁及復社諸君子計二千二百五十五人欲用一網打盡之說及今澤之登榜者有孫居相孫鼎相王允成張慎言翟學程張鵬雲楊新时期張道濬三百十九人中有八人焉一隅之地乃載多賢元祐奸籍碑千載一轍千載同慨亦千載同仰赫然安民石工今猶在版末也因志之見澤之名賢與太行同其峙莫謂澤人物惟指陵川郝文忠也

張銓字宇衡萬曆甲辰進士五典子母李夢神人裹金甲仗劍披髮入乃誕銓少有大人相授保定推官擢御史巡視陝西茶馬憂歸起按江西時經略出師銓馳奏言以短擊

長以勞赴逸以客當主非計之得今不必徵兵四方但當就近調募屯集要害若加賦選兵騷擾天下恐識者之憂不在一方因請發帑金補大僚宥直言開儲講先爲自治之本今宿將竝起事權宜一唐九節度相州之潰可爲明鑒又言張承蔭不宜恤又論今經略非大帥才而力薦熊廷弼四十八年夏復上疏言自軍興以來所司創議加賦畝增銀三釐未幾至七釐又未幾至九釐辟之身一方肩背也天下腹心也今合天下以救一方一方未必安而天下已危宜聯人心以固根本豈可朘削無已驅之使亂且內廷積金如山以有用之物置無用之地與瓦礫糞土同乃發帑之請叫闖不應加派之議朝奏夕可殊不得其解銓疏皆軍國大計悉關宗社安危而上與當軸置之不省

天啟初出按遼經略袁崇煥納降人禡屯內地銓力爭不聽曰禍始此矣未幾瀋陷天啟元年三月請令巡撫薛國用帥河西兵總督文球帥山海兵駐海州廣寧爲犄角以籍聲援疏甫上軍大潰銓與袁應泰分守應泰令銓且退保河西可圖後舉銓曰我一腔熱血欲灑此地久矣被擒不屈衣冠向闕拜又遙拜父母遂自經軍中爭呼忠臣舉屍葬之時辛酉三月二十二日事聞贈大理卿謚忠烈建祠祀額曰昭忠至今歲時贍禮肅若神明張慎言李日宣等復請再進兵部尚書世襲錦衣僉事詔以所贈官加父五典初五典聞難長號旣而曰兒死以忠得死所矣竟輟哭不受弔人稱是父是子初任推官保定時夢許達楊繼宗揖銓兩是亭曰虛左以待乃卒以孤忠勁節死難流聲

天地蓋已有先機矣爲御史巡茶馬時立糾開番釁武臣
嚴金牌納馬法按江西治強宗卹水患會遼警極論楊鎬
李如栢李如禎斷不可用立當罷斥戒輕戰弗以封疆作
孤注皆有特識銓妻霍氏後守竇莊堡敵至不能攻而退
名夫人城子道濬既襲錦衣以忠臣子見重屢加都指揮
名在魏璫東林籍榜中銓著有國史紀聞春秋集傳勝遊
草

韓肫仁字伯綸萬曆癸丑進士授大理寺評事殫心訊牒每
於死中求生而卒平反之由寺副歷寺正凡三年擢知青
州府除供億興學校清滯獄開水田興利祛弊事事脩舉
白蓮教聚衆數千有欲借以邀功者肫仁不可出諭飲酒
茹暈者卽良民不問止捕首惡抵法餘解散嘗攝道篆餘

澤州府志

卷之三十六

節行

百四

金悉置諸庫吏以例請納羨金肫仁曰汝知 羨例耶不
知不取羨吾例也嚴叱之以故苞苴盡絕民懷吏畏郡以
大治適仲弟訃至懼傷母意椎心飲泣曰季亾仲繼四體
失二何能身五上書臺使乞終養語具陳情讀之絕痛不
待命卽行抵里始聞報可加副使職養親時有旨嚴斥奪
情崇獎孝行所司廉實以聞詔旌其門曰節孝仍進爵一
級特典也奉母孺慕凡七年而病革期期不能言矣猶手
書母母字數四遂絕從子三瑒張嶼咸秉其教俱知名別
傳著有養中養才類稿

韓崇樸字佚園沁水韓王村人范曾孫爲邑諸生有才譽五
歲失母自解去采衣不茹葷血擗踊哭泣如成人鄉里以
爲奇闖賊犯州邑設僞官專以拷掠士大夫取金帛爲事

至沁水大索通政家崇樸方弱冠先諸父往辨僞令前抗不屈賊錯愕咋舌賊圍所居皆父先穴墻遯崇樸不見父恐陷賊中出砦外尋父爲賊酋所得授以一槍一包置麾下尋以他語給賊脫身走陽城白巷里至則父在焉其時天晦真不知道會白犬引之乃得達初遇賊時身已被創求父迫竟忘其痛父視其背血沾泥始知爲創也其誠孝如此

國朝竇明運字亨吾一字更生竇莊人明張忠烈銓故里也幼侗儻有大志

國初仗劍謁親王於轅門安徽中丞奇之召隸麾下踰二年中丞李來益稔其能委捕沔池趙正賊望風解散旣而李調撫廣東提授撫標中軍遊擊兼管左營時粵初定紅

澤州府志

卷之三十六

節行

百五

旗賊梁標相等抄掠郡縣而東山白水諸地胥負固明運部精兵五百擒東山僞總兵周瓊飛張權璽斬西山僞總兵張易能林志昂等閱二年羣盜以次平尋協守肇慶甫入城賊兵四合笑曰豈以我遠來疲敝耶開壁迎戰大破之已又調勦羅定力戰連破二十寨賊將羅成基駭潰無何復犯羅定戰屢捷而賊驅數萬逼城下明運曰吾兵寡晝易爲所乘不如夜擊之彼不我測乃夜率士鼓而出奮臂大呼衆皆殊死戰賊散復聚者數四已而師逼深溝不能軍北向拜曰臣力竭矣復顧家丁曰幸語吾弟速歸事老母遂拔劍自刎當轉戰時賊中呼爲綠旗竇將軍糧援不至猶搏戰累日事聞

詔贈英烈將軍予祭葬子應壽難蔭守備遷廣東龍門都司

明運殉難時應壽生甫六齡

張銓字緘三明崇禎十六年進士入

國朝爲儒官遷太學助教司典籍獲窺未見書遷兵部主事
議兩廣叙錄事與尚書左遂奪職卽杖策出春明門旣歸
悉力典墳著史臆及晉南名賢傳有功文獻年九十三卒
張道湜字子礎鈐子前尚書五典孫也順治己丑進士官編
脩善詩文書法改商洛道休息民力而造士有方攝潼關
征滇南師出關道湜調劑得宜如枕上過轉副使天津剖
疑案戒輕生掩骼埋胔仁愛獨著鎮帥有後言不較而善
遇之陳情歸養周卹黨族焚券已責好言桑梓利病長吏
重之著吏鑑節錄等集

韓璵字五城肫仁猶子也順治己丑進士官中書歷刑部郎

澤州府志

卷之三十六

節行

百六

多平反僉事易州出納軍餉三十萬例有羨餘璵用一衡
隨解扣除之利遂絕督治河隄節帑數萬改補桂林奸民
與猺獠互仇揭輒付火不問爭遂息疏止用兵交阯以弭
邊釁轉福建督糧內艱歸

韓張字傑一順治乙未進士璵兄璵少學於張出知桃源縣
作官箴未幾以疾告百姓泣留不得有詩曩憂民病猶身
病今苦盧醫不自醫孝友恬退有肫仁遺風

王紀字子魯順治壬辰進士選庶常轉禮科給事歷工戶左
右給事疏浙閩督撫不相能急宜更調至發銓部弊端尤
侃侃吏部銜之出叅政隴右舉卓異副使蘇松討平湖寇
唐四等逆折馬逢知驕橫會巡撫朱國治叅嘉定逋糧紳
士命掩捕紀力持不可願身任處分遍諭輸納事得解晉

濟南叅政請寬釋株連叛案者累累東人感頌艱歸久之
用薦起從征滇逆奮言兵事疏未上卒

韓麒趾字昌侯璵三子康熙甲子舉人知浙江石門縣革耗
羨嚴漕糧課農桑興學校事事具舉更彊幹不受奸宄欺
歷攝德清平湖秀水桐鄉海鹽五縣洗手而治所在有聲
當事以卓異薦

欽賜蟒服以州守銜知粵東之歸善旋以病告歸值荒歉蠲
金糴米以濟鄉里至今人猶頌之

張德臬字直方舉人臨汾教諭博學能文歷攝絳州孝義二
學薰陶有法士論歸之

韓萬選字宜侯璵長子歲貢秉鐸平陽遷運司一洗寒羶陋
習童試有年逾四十者閱文太息學使至獨以老童薦遂

澤州府志

卷之三十六

節行

百七

得售士林稱其作人

補田

宋梁興太行忠義社將領岳飛傳云還軍鄂州興等百餘人

慕飛義率衆來歸興會太行忠義及兩河豪傑等累戰皆
捷中原大震先是飛遣興等布德意招兩河豪傑山砦韋
銓孫謀等歛兵固堡以待王師李通胡清李寶李興張恩
孫琪等率衆來歸金人動息山川險要皆得其實盡磁相
開德澤潞晉絳汾隰之境皆期日興兵與官軍會其所揭
旗以岳爲號

元李恒簡李禹翼天興二年汴京變後南中士大夫歸河朔
者所在有之元好問寓書耶律楚材請以一寺觀之費養
天下名士內有澤人李恒簡李禹翼

明張璉字伯淳澤州人弘治丙戌進士幼有遠志自經而下

程朱是宗俸餘皆置圖書累數千卷嘗曰稱理制事各適當然是謂明經理云理云空滯云乎哉經云經云口耳云乎哉行方貌莊言論侃侃必信已直一介弗撓知尉氏宜陽課農興學旌良恥否入爲御史劉瑾銜其直罔以罪卒無驗晉河南提學僉事中官廖鵬陷之改陝西河外收糧都御史甚貪而愎璉及御史成文裁以法爲所陷除名嘉靖初起用有仇者沮之屏居山中讀書談道考訂古義正德間士厭明文沿宋靡泛之習欲振起之乃宗秦漢之作弗以爲是也曰說詞迷趣經學將晦六經四書程朱外無用師焉所著邃言舜澤記若干卷崔銑志其墓見獻徵錄李仲紳王特升李莊靖先生詩集長平李仲紳王特升序之

元鄭臯兄弟三人陽城人皆爲冠儒于所居別構一堂榜曰

麗澤以會朋友講習道義歲無虛月臯武勇有力智識過人金季喪亂率義旅鎮遏無敢犯境者一鄉賴之得安上黨公張開知其才擢爲兵馬提控積勞進階忠昌軍節度同知元初命爲本軍節度使民有逃匿山谷者以恩信招誘之離散者安集之按堵如故爲提控時覩鄭侯湘谷二流可漑屯城之田請于郡守霍公疏決之民受其賜見興利碑子鼎庭瑞甫

鄭昂霄字顯卿陽城人鼎之姪襲萬戶初就鎮見安樂堂以處三軍者卑陋下溼歲死者衆出私錢更諸爽塏每有疾擇醫藥時其飲食而躬視之死者減十八九順元土官宋隆濟弄兵從分省進擊功爲多由明威將軍進封懷遠大將軍建孔子廟于學宮延明師以教軍中子弟蜀士王履

家藏三禮圖患傳布不廣因門客王演言刻之家塾凡江湖游士經生詩客不憚招致諸軍分戍廣西海北出入瘡痍多賂求便利昂霄置籍均其苦樂脩武昌江堤濠隍病涉爲石梁以濟武昌歲輸數十萬官吏毀家以償猶不足行省命昂霄督之諸弊悉除江北流民橫行鄂岳間親詣其處散歸其民惟罪剽掠者延祐元年覃定遠大將軍戍廣西平靜江二十四寨進中奉大夫廣西兩江道宣慰使都元帥右江岑世興侵掠州縣招撫救寧獻金銀皆不受泰定二年復萬戶廣西猺賊大起詔昂霄督師諭降洞寨八十五戶二百五十二男女八百口陷賊者悉歸之天曆用兵拜湖廣行省叅政改行樞副戰于偃師西兵數敗復湖廣叅政征蜀抵播州石虎關蜀道通歸辭疾不允卒年

澤州府志

卷之三十六

節行

百九

六十詳見許有壬揭奚斯兩碑

鄭濤字子壽號謙齋昂霄之子襲萬戶江北河南寇亂巡綽湖廣以獲賊多陞明威將軍湖南道宣慰同知副都元帥猶帶元降虎符至正十二年隨平章也先鐵木兒于裕溪等處累立戰功十六年除河東山西道宣慰同知清其心以運用傾其惠以沃民禁兵戢暴民頌其仁廉謂之父母焉詳見碑文

王演鄉貢湖廣通城縣教諭爲鄭叅政昂霄門客蜀土王履有家藏三禮圖患傳布不廣勸鄭捐俸刻之家塾碑版文字古雅有體逸詩刻石翩翩有致足爲文士之秀

明李幹字本固貢士爲眞定縣丞專理馬政要衝疲敝處之裕如以薦陞肥鄉縣知縣縣亦疲敝故多積水農夫棄而

不治乃躬督蓄洩爲稻田若干頃地無遺利作興人才登科甲者前後相望民某氏以義閔其姪賙濟甚厚不留其券旣家業頓廢求養于姪姪以無徵負之訴於郡郡以無徵難之幹按其事密令盜誣以贓因詰所以致富者曰叔所遺也召叔至竝出其詞稽顙服罪聞者稱明在縣六年撫按交薦有守已愛民之褒將再擢以老乞歸卒年七十五詳見尚書李瀚墓表

田濟號愚齋陽城人歲貢官固安縣訓導武宗朝疏諫十事固安門人刑部郎中蘇志皋潞城縣知縣張思誠同爲立碑題曰忠義田公記曰愚齋師司教吾庠人材大就疏章諫君分俸伯母舅公生等以彰師之忠孝焉

武傑以舉人知河南沈邱縣 流寇之亂中州百城皆陷而沈邱獨全以傑能得衆心如墨子之守也人以爲張巡而後一人掛冠歸避寇于麻樓山賦詩見志忠義之氣尤著焉

金郝子颺有詩名號東軒老人天挺之伯父也元好問誌天挺墓曰先生之伯父東軒先生始宦學蔚爲聞人郝氏儒學固始于子颺也

明呂黃鍾字初陽澤州人天啟乙丑進士知魚臺縣積年疑獄片言折之士民頌神君焉皇筏南下夫役累民公呼搶當事前爲民請命得不過擾置勸農亭於邑中日與田夫野老相慰勞問稼穡之艱難有古循良風後值桐封在魯供帳絡驛公心乎衛民而仍不乏上供上下咸得其所苟非幹材曷克濟此越一年調補歷城在任三載尤得辰心

案牘重情平反甚多有可矜全者必疎網置之嘗曰去莠所以衛苗禁奸所以爲良也逮者鞠者得申其法而寧必東濕哉歷歷諸善政兩邑勒石至今思之不替在邑聲譽大著內擢戶科給事中未幾以性戇直與枋國者忤遂劾之以年例外轉脩兵青徐時歲饑盜賊蠡起充斥四境多方籌畫繕兵濟餉各得其宜盜亦隨撲滅遂以勞瘁卒於
宦宦蹟載曹州志

三十六卷終

澤州府志

卷之三十六

節行

百十一

